

Apasol ai kauga Pariverena

Luke ana buka i giruma vorovei ma muriai Apasol ai kauga bukana i girumi. Tauna ana ano gaegeaena lamna i goei da rava ita viegei da menanare Arua Vivivireina Iesu ana tauvotaḡotaḡo i rau-etaraveni da Riwana Aiaina ita vituai,

Au Jerusalem ma au Judea au anatapuna ma au Samaria ma dobu au gia dewadewana.

(1:8)

Kerisiana ai babara ma ai nola i babaniei. Mai Jew awarii i vikarei ma i nae da dobu anatapui i vitumaḡana. Tauamgiruma ana nota gaegeaena da wei bukana tauiaavana ita parivere i da kerisiana avena Rome gabemanina ita viviḡaviei. Kerisiana vitumaḡanana lamna mai Jew ai vitumaḡana e kaukauana-paiei. Wei bukana i ḡutai da raḡaraḡana tonuḡa, ma e viviatataieta da dobu au anatapuna Iesu Riwana Aiaina i jimei ma ekalesia i vitupui:

Iesu ana gae au murina Ekalesia au Jerusalem ai nola i vikarei;

Palestine taun ḡelau i awari i tua-nae;

Ma i tua-nae au Mediteranean da i nae au Rome paratana. Wei bukana ana kauga gaegeaena lana Arua Vivivireina i nolanola, ma rewapana tauvitumaḡana au Jerusalem i verei au Pentecost. Ma wei au bukana i vieḡeta da Arua vivivireina mara nonoa agu ma rewapana ekalesia ma ai babada i verei ai au aninola au anatapuna. Wariaḡa kerisiana ai pariverena

i tere-tagogiei raugugula au maḡamaḡai, ma kauga ma ai nola i kaukauei anatapui. Wei au bukana i girumi da wei parivai-nuaḡanana ana rewapana tauvitumaḡana ai au lawana ma kerisiana ai au voepaepa i viatataieta.

Buka rereḡana 1.

Vokaukauga tauvimatamata aubai (1:1-26)

Iesu ana tarawatu ma ana parivainuaḡana
damona (1:1-11)

Judas Epaiana (1:12-26)

Tauvimatamata au Jerusalem (2:1–8:3)

Tauvimatamata au Judea ma Samaria (8:4–
12:25)

Paul ana nola (13:1–28:31)

Paul ana vaḡai tagogi (13:1–14:28)

Boru au Jerusalem (15:1-35)

Paul ana vaḡai viruaina (15:36–18:23)

Paul ana vaḡai vitonuina (18:24–21:16)

Paul i vipanipani au Jerusalem, Caesarea, ma
Rome (21:17–28:31)

Iesu ana Apasol i parivainuaḡani

¹ Egualau Theophilus, buka au naona a girugirumia* lamna Iesu ana tupua ma ana nola i vikarei da i kaukauei ma i viviararamana a pariverem ² i nae da ana ḡae au marana. Muriai da Iesu i ḡaiei au mara, Tauna Arua Vivivireinei ana apasol vinevinei riwa bagibaginei i pariveri. ³ Iesu ana iraḡe au murina i vieḡana-melei ana apasol awarii. Ma kauga maḡamaḡai i kaukauei da apasol i vitumaḡana kauga da Tauna anina i lawana me.

* **1:1:** Bukana au naona i girugirumi lamna Luke ana Gospel

Tau i awarii i eġa au pom 40 au orana ma God ana vigulau i babaniei. ⁴ Maranai ana apasol maiteni i vitagogiei ma i riwana-guratei i pa, “Eġa Jerusalem ona oputawanei, wate pulona amau i paripari-vainuaġaniami ona paini, maraotai a ririwemi nanare. ⁵ ✨ John wairei i babataito, wate mara aburuna ava Amau, Arua Vivivireinei taumi ina babataitomi.”

God Iesu i ġaiei au Mara

⁶ Muriai maranai Iesu ma Apasol i vitagogiei ma tau i Iesu i vitara-virevirei i pa, “Bada! Marina, Israel ana† vigulau ma vere-melei bo?”

⁷ Ma Iesu i paribelei, “Amau ainelana ana rewapanei mara ma iri e vivibadei, aubaina da taumi eġa ona aramanei. ⁸ ✨ Wate maranaina Arua Vivivireina au orami ina rui, maranaina taumi rewapana ona vaia. Ma aubaiu ona vitaunola au Jerusalem, Judea, au Samaria ma dobu au anata-puna.” ⁹ ✨ I babani vorovei ma au matai God Iesu i ġaiei au mara. Ma apau i nei da i purui ma tau i eġa ita inana-melei.

¹⁰ Ma tau i ġoġouta au mara ma nelara ruaġa ai gara ararapoiri au ririvai i raumairiei. ¹¹ Ma i riwa, “Mai Galili, aiwai weka o maimairiei ma o ġoġoutatei? Wei ravana menanarena o inanai i ġaenei, amapo nanare ina nememei.”

Judas epaiana i vinei

¹² Anina ma Apasol Ola Olive, i voterei ma i ġaira me au Jerusalem lamna eġa uama ma au

✨ **1:5:** Mrk 1:8 † **1:6:** Rome gabemanina Juda i vibadei wei au marana, Mai Jew wei eġa ita ġoei, ma i ġoei da ita virai. ✨ **1:8:** Mrk 16:15 ✨ **1:9:** Mrk 16:19

geregere. ¹³ ✨Ma au Jerusalem i gēta ma i gāe numana i mamae lana au tepana au vatavata. Tau ai wava, Peter, John, James ma Andrew, Philip ma Thomas, Batolomeo ma Matthew, James - Apius natuna, ma Simon tauna au naona Zealot ‡ ma Judas - James natuna. ¹⁴ Ma wei ravai mara patapatana i vivitagogiei ma i raraupari gogona, waivine gēlauri ma Iesu ana roaroa ma aloi Mary maiteni kampa.

¹⁵ Wei au marana, tauvitumaḡana 120 i vitagogiei ma Peter i vomairi ma wenanare awari i babani, ¹⁶⁻¹⁷ “Varevareiu, Judas Iskariot lamna turata tagogi ma maiteni ta nola gogona, wate muriai i voagu da Iesu i pani. Arua Vivivireina wei riwana wariḡa gulau David i riwei da ina tupua; ma aiwai i ririwei anina nanare i tupua.” ¹⁸ Judas Iesu i amverenei mane vainana aubaina, ma wei manenei doa i gimarai. Ma nai au doana tauna kolanei i peu ma manawana i wanawamai da amoamona i opu. ¹⁹ Ma rava anatapui au Jerusalem wei iraḡena riwana i nonori, lamna aubaina tauī nai dobuna ai ponei i viwawai Hakeldama, wei anona *Tara Doana*.

²⁰ “Wariḡa Gulau David i girugirumia, nanare i tupua,

*Ana animae ina kwakwava,
ma eḡa aiai au orana ina mae. (Psalm 69:25)*

Ma

rava ḡelauna ana nola ina vaia. (Psalm 109:8)

✨ **1:13:** Mrk 3:16-19 ‡ **1:13:** Rava ununurana. Wei ravai mai Rome ai gabemani e viviḡaviei.

21 ✨ Lamna aubaina marina awarita, rava ġelauna tana vinei da ina raviepaiai. Tauna ravanana Iesu maiteni ta bababara-nae madeġa tonuġa au orana, 22 John rava i babataitoi au marana ma i nae da Iesu i ġaiei au mara. Ma maiteni tana nola ma rava tana riwei menanarena God Iesu iraġelei i vovaimairini.”

23 Ma tau i rava ruaġa i vinei, Joseph-Barsabas (ana wava ġelauna Justus) ma Matthias. 24-25 Anina ma tau i raupari, “BADA tam rava anatapui orai u aramanei. Ma vieġelai da wei ravai ruaġa, ma metauna u vinei da Judas ana gabu ina vaia da ina viApasol, aubaina Judas i voterelai da i nae ana au gabu.” 26 Anina ma tau i vine, ma vinevine Matthias awarina i peu, ma tauna i vi-Apasol, ma Apasol 11 au orai i rui. §

2

Arua Vivivireina i ġairai

1 Pentecost torelana i ġetai ma tauvitumaġana anatapui numa tagogi au orana i vitagogiei. *

2 Maratagogi gugura ġaeġaena, nonorana me ive vivirewapanana marei i ġairai ma tauvitu- maġana i mamae numana i vioai. 3 Tau i purapura inanana me ai menamenana i ’nanai, i ġairai ma

✨ **1:21:** Mrk 1:9; Mrk 16:19 § **1:26:** Wei kalona wenanare: mai Jew wava ġaima muomuoi awari i girugirumi ma e tawatawanei, ma aiai ana namba i eġa lamna tauna ina vaia. Tau i vitumaġana da wei kauana awarinei God tau i ina viatataiei da aiai ita vinei. (Pro 16:33) * **2:1:** Mai Jew ai Raġona torelana au murina au pom 50 ma Pentecost torelana e vivikarei. Wei riwana anona amapo wei bukana au damona ona iavi ma ona aramanei.

rava tagotagogi ava au kolai i kiala. ⁴ Ma Arua Vivivireina anapui i vioai ma pona taputapunei ava i bababani Arua ana aguei.

⁵ Nai maranaina mai Jew patupatutui dobu au anatapuna i vitaomana au Jerusalem da Pentecost torelana ita apui. ⁶ Ma patarai kampa i viruberubei, ma i nonori da gugurana lamna tauvitumaḡana tau tagotagigiava ai ponei i bababani ma tau ai nota i kwa. ⁷ Tau anapui i baei ma tau ava i babani vivira i pa, “Wei mai Galili bo? ⁸ Ma menanarena da anaputa awarita ata ponei e bababani! ⁹⁻¹⁰ Tauta ḡelauta mai Parthia, Mede ma Elam, ma mai Mesopotamia, Judea, Capadosia, Pontus ma Eisia, Pirijia, Pamphilia, Egypt ma Libya navanavana, au Sairini au ḡereḡerena, ma ḡelauta mai Rome, ¹¹ ḡelau mai Jew ma ḡelau Jentail wate inibori i vaia da i vimai Jew. Ma ḡelauta mai Crete ma mai Arabia. Wate God kaua ḡaeḡaena i kaukaueia, ata ponei i bababaniei ma ta nononori!” ¹² Tau anapui i vinuanaina, nuanuai i raḡaraḡa ma i bababani vivira, “Wei aiwai kauana e tuputupua?”

¹³ Wate ḡelau tau i vinamei i pa, “Wei ravai i uma bua!”

Peter rava awarii i raugugula

¹⁴ Anina ma Peter i vomairi Apasol 11 maiteni, ma ponana ḡaeḡaenei patara awarii i babani,

Au rava mai Jew ma anapumi au Jerusalem maemaemi, babani ana tere-kauei da ona aramanei. Ona rautaniḡana kaua. ¹⁵ Wei

marinaota, 9 kilok ubaubanai! † Wei ravai eġa ita uma bua me taumi o notanotai nanare,

16 Wei lamna wariāga peroveta Joel i ririweia e tuputupua:

17 *Mara au damona,*

Aruau rava anatapui awari ana iwaġi.

Ma natunatumi nelarai ma waivinei riwau ina jimei,

ma nelara voui mataiei kaua ina inanai,

ma babada magumaguri rauboniei kaua ina inanai.

18 *Wate nanare, Aruau ana iwaġi au taunola nelarai ma waivinei awarii,*

ma ina vitaubabani.

19 *Ma kaua babai au mara ana kauai,*

ma au dobu mataira ana vieġai

ai araratana, tara ma bau potopotona.

20 *Ma madeġa ina waguwarei*

ma nawaravi ina ravitaratarai,

muriai da BADA ana mara ġaeġaena ma boruborumana ina nei.

21 *Nai au marana aiavoi da BADA awarina e viviġore agu aubaina BADA tau*

ina vilawani.

(Joel 2:28-32)

22 *Ma Peter* i babani me:

Mai Israel ona rautaniġana: *God Iesu Nasaretei* i vovai-virewapani da kaua babai, ma mataira ġaeġaei i kauai da ita viatataiemi da tauna anina Godei i nei. 23 ✧ *Wate God* wariāga i viogei ma

ana ġoana nanare da Iesu au urami i terei, ma taumi ġo'apoapoe ravai ai aguei, Tauna au korsi o tuparatui da o viraġeni. 24 ✧ *Wate God,*

† 2:15: Mai Jew tau i au bigai sia e aniani ma wain e umaumai.

✧ 2:23: Mrk 15:24 ✧ 2:24: Mrk 16:6

Iesu iraḡelei i vovaimairini, ma iraḡe iniviarana i vaitawanei ma iraḡe eḡa tagotagogina da tauna ita vojijini. ²⁵ Wariaḡa David Iesu i bababaniei maranai i riwa:

Tau a inana! BADA God au naou mara au anata-puna.

Tauna au oieu lamna aubaina eḡa ana rovo.

²⁶ *Lamna aubaina nuaiai orau i oai ma menau i morelana, ana iraḡe ma a aramanei da tupuau ma painakauai.*

²⁷ *Ma aruau eḡa rava irairaḡei ai au dobu ma voterei, ma tam eḡa am taunola vivivireina tupuana ma voterei da ina buda.*

²⁸ *Tam lawana etanaina u viatataieu, ma Tam maiteni a mamae ma a vinuai ai kaua. (Psalm 16:8-11)*

²⁹ Au rava, A riwana-kauemi da amata gulau David i'raḡe da i doboi, ma ana kokoaga weka e mamae. ³⁰ ✧ Wate David lamna peroveta, ma i aramanei da God i parivainuaḡani da ana damei gulau ina opu, me tauna nanare. ³¹ Ma David i'nanai God muriai aiwai ina kauai ma i riwa, *Keriso ina vomairi me,*

ma tupuana eḡa rava irairaḡei ai au dobu ina voterei da ina buda. (Psalm 16:10)

³² Ma God Iesu-na tagogina iraḡelei i vovaimairini, ma tauai anatapuiai a vimatamata. ³³ Ma God i ḡaiei ma au oiena i vikialai. Ma Arua vivivireina i verei me i parivainuaḡana nanare, ma nai Aruana tagogina Iesu awariai i waḡi, lamna marina o nononori ma o inainanai. ³⁴ ✧ David eḡa ita ḡae

au mara, ma wate i riwa, BADA *au Bada i riwei*, “*Au oieu ma kiala* ³⁵ *ma am ġavia au ae karem ana terei.* (Psalm 110:1)

³⁶ Lamna aubaina mai Israel anapapuni ona aramana-kauei da wei ravana Iesu o tupatuparatuia, God i terei da BADA ma Tauvilawana.

³⁷ Ma maranai rava wei riwana i nononori, tau i orai i rautonai da Peter ma Apasol ġelau i riwei, “Varevareiai, tauai aiwai ana kauei da ana lawana?”

³⁸ Ma Peter i paribelei, “Taumi tagotagogi ava Iesu Keriso wavanei ona rupena ma ona babataito ma ami ġo’apoapoei ina nota-tawanei, ma God ana pulo Arua Vivivireina ona vaia. ³⁹ Wei parivai-nuaġanana lamna taumi natunatumi maiteni aubaimi. Ma wate nanare mai jentail - aiavoi da e kwatukwatuei ina nei Tauna awarina.”

⁴⁰ Ma Peter riwa ġelau maiteni rava i vinua-terenei, ma i egari, “God ona vianinei da ina vilawanimi, ma eġa kovoġa ona vaia.” ⁴¹ Ma rava maġamaġgai Peter ana babani i vitumaġanei ma i babataito ma nai au marana rava 3,000 ai au boru i rui.

Tauvitumaġana i mae gogona

⁴² Ma tauvitumaġana Apasol ai viararamana i nononori, ma i viboruboru, i amam ma i raraupari gogona. ⁴³ Apasol kua babai ma mataira ġaeġae maġamaġgai i kaukauei ma anapapui i rovo ma God i vivirana-kauei. ⁴⁴ ✧ Ma tauvitumaġana anapapui gabu tagogi i vivitagogiei ma aiwai ġariei ai rava maiteni i ġutaġutai. ⁴⁵ Tau i ai doa, ai numa, ai wapu

✧ **2:44:** Act 4:32-35

ma ai purapura i gimagimarei ma manena ai rava gēlaui maiteni i gūtaḡutai. ⁴⁶ Tauī mara patapatai au tempol i vivitagogiei, ma ai au numa ana nuaiāi ma ana morelanai i amam gogona. ⁴⁷ Ma tauī God i vovoepapai ma rava anataḡui i vivinuaiāini. Ma marana patapatai rava voui i neneiai Iesu awarina ma tauvitumaḡana ai boru i viviratai.

3

Peter, oroto aena gwaḡagwaḡana i vilawani

¹ Mara tagogi au bigai 3 oklok, Peter ma John pari aubaina i gēḡae au Tempol. ² Ma oroto tagogi aena gwaḡagwaḡana i tupuei, ma mara au anata-puna ana rava i avavara neiāi da Tempol metaetana, e ḡoreḡorei, metaeta aiāina, kampa i vivikialai ma rava i ruirui tempol au orana i vivigimanei mane aubaina. ³ Maranai i 'nanai da Peter ma John aburuna ava da au metaeta ita rui, ma i vibaḡai mane aubaina. ⁴ Peter ma John orotona i 'nana-tunutunui ma Peter i riwa, “Ma inanaiai!” ⁵ Ma orotona tauī i 'nanai ma i notanotai da aiwai awarii ita vaia. ⁶ Ma Peter, orotona i riwei, “Awariu silva ma gold eḡa wate aiwai awariu lamna ana verem. Iesu Keriso Nasaretei, wavanei ma vomairi, ma babara!”

⁷ Ma Peter oroto nimana au oieina i vojijini ma i voagui da i vomairi. Ma maratagogi oroto aena ma ae kwarukwaruna i ai ma i virewapana, ⁸ ma aenei i viauepa ma babara i vikarei. Anina ma tauī maiteni i rui au tempol ma tauna tempol oraninei i bababara, i viviauepa ma God i vovoepapai. ⁹ Ma rava anataḡui orotona i 'nanai i bababara ma God

i vovoepaepai, ¹⁰ ma i aramanei da tauna ravana tagogina tempol metaetana e ġoreġorei *inanana aiaina* au naona, i kiakiala ma i vivigimana. Ma rava anapui i 'nanai aiwai i tupua wei orotona awarina ma i ba-guratana.

Peter patara awarii i babani

¹¹ Ma orotona Peter ma John i vovojjini ma rava anapui i bana-kauei, ma i viruberubei tau i awari au lovelove e ġoreġorei, Solomon ana lovelove. *

¹² Ma maranai Peter patarai i 'nanai ma i riwei:

Au rava mai Israel, aiwai aubaina o vivinuanaina? Ma aiwai aubaina o inainana-tunutunui, apamina tau i ai rewapani bo ai vipatutuei, wei ravana a kauei da i babara?

¹³ ✧ Wei lamna amamata Abraham, Isaac ma Jacob ai God, ana taunola Iesu i viborumei, ma taumi Tauna o verenei da ita viragēni, ma Pilate au matana o geduaiei. Pilate i ġoei da ita rupeni wate taumi eġa ota vianinei. ¹⁴ ✧ Iesu lamna rava vivivireina ma jijimanina, wate o geduaiei.

Ma Pilate i ġoei da Iesu ita rupeni, wate taumi o ġoei da tauviragēna i rupeni aubaimi. ¹⁵ Ma taumi lawana maemae-nonoana tauvereina o viragēni, wate God i vilawana-melei, tau i wei a vimatemei. ¹⁶ Wei ravana aena gwaġagwaġana Iesu au wavana i vitumaġana ma lamna aubaina i lawana. Taumi o aramanei ana doria menanare, Wate ana tumaġana Iesu awarina i vilawani.

* **3:11:** Solomon ana lovelove tagogi tempol au orana e mamae. Wei lamna gari au ririvana ma ana tuatua maġamaġauna. ✧ **3:13:** Exo 3:15 ✧ **3:14:** Mrk 15:6-14

17 Ma au rava marina a aramanei da taumi ami babada maiteni Iesu o viraḡeni, aubaina taumi eḡa ota aramanei da tauna tauvilawana. 18 Wate wei lamna wariāḡa God ana peroveta anata-pui i ririweia i tupua, God i riwa da ana tauvilawana ina vinuapoapoe. 19 Ami ḡoa apoapoe Ona voterei ma ona mae-taviremi God awarina da tauna ami ḡo'apoapoe ina nota-tawanei. 20 Ma lamna maranaina God aruami nualawalawana ina verei, God Iesu i vinei da ami Tauvilawana ma ina paritawaneiai. 21 Iesu au Mara ina mae da God kua anatapui ina ravivouni, me God ana peroveta vivivirei wariāḡa i ririweia nanare. 22 ✧Moses i riwa, “BADA ami God peroveta, me tau nanare, ina terei ma tauna ami dam oinei ina nei. Ma aiwai anatapuna e ririwemi ona rautaniḡanana-kauei. † 23 ✧Ma aiwai da wei perovetana eḡa ina rautaniḡanei lamna God ana rava awariei ina vilamonei.”

24 Peroveta Samuel ma muriai Peroveta maḡamaḡau, kua i ririweia marina e tuputupua. 25 ✧Taumi nai perovetai natunatui ma taumi maiteni parivainuaḡana bagibagina au orana. Au baina God Abraham i riwei, “Am epaepaia awariei dam anatapui au dobu ana viaiaini.” 26 Ma maranai God ana taunola i vinei, ma au naona i paritawaneiai awarimi da ita viaiainimi, ma lamnei taumi tagotagogi ava ami ḡo'apoapoe ota opu-tawanei ma ota nei Tauna awarina.

✧ 3:22: Deu 18:15, 18 † 3:22: Mai Jew e ririwa da Moses lamna ai peroveta ḡaeḡaena. ✧ 3:23: Deu 18:19 ✧ 3:25: Gen 22:18

4

Jew babadai Peter ma John i etarei

¹ Peter ma John rava awari i bababani ma pirisi pulo tauapuina ma tempol taupainii* ai bada ma Sadusi ḡelau † i ḡetai. ² Tau amloi i ḡaiḡai kua Peter ma John awari aubaina tau i viviararamana da God, Iesu iraḡelei i vovaimairini ma wei i viatataiana da God rava anatapui iraḡelei ina vovaimairini. ³ Tau Peter ma John i pani ma au i pom aubaina panipani au numana i terei da i mae mara. ⁴ Wate rava maḡamaḡau riwa i nonori ma i vitumaḡana, ma ai maḡa nelara 5,000 waivine eḡa ita iavi.

⁵ Ma mara i tom ma Jew babadai, dogadogara ma tarawatu babadai au Jerusalem i vitagogiei.

⁶ Ma pirisi ḡeḡetelarana Annas kampa ma Caiaphas, John, Alexander ma pirisi ḡeḡetelarana ana rava maiteni. ‡ ⁷ Ma tau Peter ma John i neiei da au naoi i vimairini ma i riwei, “Aiwai rewapananei, ma aiai wavanei wei o kauiei?”

⁸ Arua Vivivireina Peter orana i vioai ma tau i riwei, “Rava ai babada ma dogadogara; ⁹ tauai kua aiaina a kauiei gwaḡagwaḡana awarina ma amadodo taumi o vitara-virevirelai, da menanare tauna i lawananei. ¹⁰ Ma wei ona aramana-kauiei,

* **4:1:** Tempol tau-painina lamna anatapuna au tempol e inainana-vaitetei (purusimani). Tau pirisi ḡeḡetelarana ana taunola. † **4:1:** Sadusi tau iraḡelei vomairime eḡa ita vitumaḡanei

‡ **4:6:** Mai Rome Caiaphas i vinei da Pirisi ḡeḡetelarana, poiana Annas epaiana. Wate mai Jew ai au giu da aiai pirisi ḡeḡetelarana vaivaina i vaia, tauna anina ina mae da au iraḡe. Luke e ririwa da Annas tauna pirisi ḡeḡetelarana.

da taumi ma mai Israel anatapui, da Iesu Keriso Nasaretei o tuparatui, Wate God tauna iraḡelei i vovaimairini ma tauna wavanei wei orotona au naomi lawalawaina e maimairi. ¹¹ Taumi tauvoa nai ḡaimana o geduaiei, wate wei gaimana lamna numa ogona, numa ana tapuna e vovojijini. §

¹² —Lamna aubaina Iesu ainelana ina vilawanita. Ma God eḡa aiai ḡelauna au dobu rewapana ita verei da ina vilawana.”

¹³ Ma tauī Peter ma John ai tepatora inana ma maranai i aramanei da tauī eḡa girugirumai, ma i baei. Ma i aramanei da tauī Iesu ana tauvotaḡotaḡo. ¹⁴ Ma wate i ’nanai oroto i vivilawania Peter ma John maiteni i maimairi, lamna maranai tauī gamoi i pota. ¹⁵ Anina ma Peter ma John i riwei da boru gabuna i opu-tawanei, ma tauī ava i vitarairavira vivira. ¹⁶ Tauī i vitaraviravira-viravira i pa, “Aiwai tana kauēi wei nelarai awari? Rava anatapui au Jerusalem i aramanei da tauī kaua babai i kaukauēi, lamna eḡa tana boviei. ¹⁷ Wate tana viḡaei da wei kauai eḡa ina tua rava ḡelauī awari, ma riwa bagibaginei tana viḡaei da eḡa aiai awarina Iesu wavanei ina raugugula.”

¹⁸ Anina ma tauī i ḡorei da i rui me, ma riwa bagibaginei i viḡaei da eḡa aiai awarina Iesu wavanei ina raugugula bo ina viararamana. ¹⁹ Wate Peter ma John tauī i paribelei, “Taumi ami nota aiwai. Tauai God ana voteletelei bo taumi? ²⁰ Tauai aiwai a inainanaia ma a nononoria babanina eḡa ana voterei.”

§ 4:11: Mai Jew ai numa ḡaimēi i voavoai. Iesu tauna anina God ana Tempol vouna oḡona. (Eph 2:19-21, Isa 28:16).

21-22 Wei Orotona i vivilawani lamna gwaḡagwaḡana ma ana madeḡa 40. Lamna aubaina rava anatapui God i vovoepaepai, ma babada eḡa ita aramanei menanare Peter ma John ina kovoḡanei. Ma i parivairovorovo-melei ma i paritawanei da i nae.

Tauvitumaḡana God i vibaḡai agu aubaina.

23 Peter ma John i nae me ai rava awari ma pirisi ḡaeḡaei ma dogadogara aiwai i ririweia tau i vieḡei.
24 ☆Maranai tauvitumaḡana wei riwana i nonori, tau anatapui i raupari gogona God awarina:

BADA tam ai gulau, Tam mara, dobu, boga ma anatapuna au orana maemaei taukaueina.

25 Tam Arua Vivivireinei am taunola, amai David gamonei u babani ma u riwa,
Aiwai aubaina rava awariai e mejimeji,

ma aiwai aubaina ai oga e taratara labalabai?

26 *Ma dobu ai gulagulau i vokaukaua ma babada ḡaeḡaei ḡelau maiteni i vitagogiei da*

BADA ma ana tauvilawana maiteni i viḡaviei.*
(Psalm 2:1)

27 ☆Anina riwa kaua. Wei kaui weka au Jerusalem i tupua, Herod ma Pontius Pilate, Jentail ma mai Israel maiteni i vitagogiei, da am taunola vivivireina Iesu u bulobuloia i viḡaviei. 28 Ma tam am rewapanei ma am ḡoanei am oga menanare u tarataranei marina nanare i tupua. 29 BADA, nai ravai ai parivairovorovo au uram ma am taunola ma vovai-virewapani da ana tepatorai riwam ina raugugulei.

☆ 4:24: Exo 20:11 * 4:26: Wei lamna Keriso. ☆ 4:27: Mrk 15:1

³⁰ Uram ma viloloi da ma vilawana ma kaua babai ma mataira gāeḡaei ma kauei, am taunola Vivivireina Iesu wavanei.

³¹ Ma pari au murina, tauī mepa i vivitagogiei gabuna i vīgu. Ma Arua Vivivireina anapui orai i vioai. Ma ana tepotorai God riwana i raugugulei.

Tauvitumaḡana ḡariei i ḡutaḡutai

³² ✧Tauvitumaḡana anapui ai nota ma orai tagogi. Ma ai purapura tagogi ma eḡa aiwai ita nuanei. ³³ Ma Apasol ana tepotorai ma rewapanai BADA Iesu ana iraḡe, ma ana vomairi me i raugugulei. Ma God ana viaiaina gāeḡaena tauī anapui awari i peu. ³⁴⁻³⁵ Ma tauī au orai eḡa aiwai ita voladaḡei aubaina, ai rava ḡelauī ai doa bo ai numa i gimagimarei ma manena i neneiai Apasol awari i tereterei, ma aiwai da aiwai i vovoladaḡei nanare i vovoagui.

³⁶ Me Joseph, tauna Levi ana damei, au Saipras i tupua, ma Apasol tauna i ḡoreḡorei Barnabas, wei wavana anona lamna tauduḡu. ³⁷ Tauna ana doa i gimarei, ma manena i nei ai da Apasol awari i terei.

5

Ananias ma Saphaira

¹ Anina ma Ananias awana Saphaira maiteni ai doa navanavana i gimarei. ² Ma airuaḡa i vianina tagogi da mane navanavana i nuanei, ma Ananias mane navanavana i naiei da Apasol awari i terei.

³ Anina ma Peter tauna i vitaravirevirei, “Ananias aiwai aubaina Satan u vianinei da au oram i rui ma Arua Vivivireina u morui, ma doa u gimagimarei

✧ **4:32:** Act 2:44-45

manena navanavana u nuanei? ⁴ Doa lamna tam ġarimei da uta gimarei bo eġa. Ma maranai u gimarei lamna manena tam ġarimei da uta verenei, aiwai aubaina nota apoapoena au oram i rui? Tam eġa rava awarina uta moru, wate God awarina u moru.” ⁵⁻⁶ Maranaina Ananias wei riwana i nononori, tauna i peu da i’raġe. Anina ma nelara i rui da tupuana i umai ma i naiei da i doboi. Ma aiavoi da wei riwana i nonori i rovo kaua.

⁷ Tau i eġa ita mae guratana, ora tonuġa nanare ma awana i nei, aiwai i tupua eġa ita aramanei. ⁸ Ma Peter wavine i paridadanei, “Abe uta riweu, tam awam Ananias maiteni doa o gimagamarei maiana anina wei bo?” Ma tauna i paribelei, “Ee, doa maiana anina nai.”

⁹ Ma Peter i riwa, “Aiwai aubaina taumi o vianina da BADA Aruana ota raudadani? Nelarai awam i dobodobo i ma inanai au metaeta da tam maiteni ina avara-opunem.”

¹⁰ Maratagogi wavine Peter au ae karena i peu da i’raġe. Maranai nelara i rui au numa ma i ’nanai da wavine i’raġe, anina ma i avara-opunei da awana au ririvana i doboi. ¹¹ Lamna maranaina ekalesia anatapui, ma rava aiavoi da wei riwana i nonori i rovo kaua.

Apasol rava maġamaġai i vilawani

¹² Ma Apasol mataira ma aniba kauai maġamaġai i kaukauei rava awari. Ma tauvitumaġana Solomon ana au lovelove i vivitagogiei. ¹³ Wate rava ġelau ai au boru ruina i rovoei, wate rava tau i vivirana-kauai. ¹⁴ Wate nelara ma waivine maġamaġai Iesu awarina i vitumaġana ma tauvitumaġana ai au boru i ruirui.

15 Ma lamna aubaina rava ai rava doridoriai i avavara-opunei au eta ma ai au animatave i vimataveni, da Peter inii ita vodadani bo eġa da ġouna tau i ita ġouni da ita lawana. 16 Ma melagai ġelau i Jerusalem au ririvana ravai maġamaġau i rava doridoriai, ġelau i arua-apoapoei i ruiruinia i neiai ma anatapui i vilawani.

17 Anina ma pirisi ġeġetelarana ma ana rava mai Sadusi anatapui orai unura i oai. 18 Ma Apasol i pani, ma panipani au numana i terei. 19 Wate waguvarai BADA ana anela i nei da panipani numana metaetana i votawanei, ma tau i taravainaponei ma i riwei, 20 “Ona rui tempol au orana, ona mairi ma lawana vouna riwana anatapuna rava ona parivere i.” 21 Anela i ririwei nanare, tau i tempol i rui ma rava viararamanai i vikarei. Nai maranai pirisi ġeġetelarana ana rava maiteni i ġetai ma boru ġaegāena e ġoreġorei Sanhedrin i terei. Ma rava i paritawanei au panipani numana da Apasol ita neiai awari. 22 Tau i panipani au numana i ġeta ma i baina-avei, ma i naeme da i vieġa. 23 I pa, “Panipani numana anina i gudu-kauei, ma tauvipaipai au metaeta i maimairi; wate maranai tau i metaeta a votawanei lamna eġa aiai kampa.” 24 Maranai tempol taupainina ai bada ma pirisi babadai wei riwana i nonori, tau i vinuanaina da aiwai i tupua.

25 Ma rava tagogi i nei ma i riwa, “Ona rautaniġana! Nelara panipani au numana o teretereia, tau i tempol e maimairi ma rava e viararamani.” 26 Anina ma tempol taupainina ai bada, ma babada ġelau i maiteni i nae ma Apasol i neiai. Tau i rovo ma eġa ita egari mepa da rava ġaime i ita ravi.

²⁷ Ma Apasol i neiai boru gēgētelarana au naoi, ma pirisi gēgētelarana tau i vitara-virevirei. ²⁸ I pa, “A riwana-guratemi da wei ravana au wavana avena ota viararamana, wate ami viararamana i tua da Jerusalem i oai. Ma wei ravana tarana wavuna tauai o vereverelai.”

²⁹ Ma Peter Apasol gēlauri aubai i vitauvibabani i pa, “Tauai God ana voteletelei ma ega rava. ³⁰ Taumi Iesu au *korosi* o tuparatui ma o viraḡeni, wate amamata ai God Tauna i vovaimairini. ³¹ Ma marina Tauna God au oiena e kiakiala, Tauna BADA ma Tauvilawana, Da mai Israel ai gō’apoapoe ina rupeni, ma ai gō’apoapoe ina nota-tawanei. ³² Ma tauai Arua Vivivireina maiteni wei kauai anata-pui mataielai a inana. Ma nanare God Arua Vivivireina i paritawanei rava votelatelai awari.”

³³ Tau i wei babanina i nonori ma amloi i gāiḡai kua, ma i gōei da Apasol ita viraḡeni. ³⁴ Wate Pharisi ma tarawatu badana wavana Gamaliel, rava anata-pui wei ravana e vivivirei. Tauna Sanhedrin boruna au orana i mairi, ma rava i riwei da Apasol i opunei au doa mara aburuna ava. ³⁵ Anina ma ana rava i riwei, “Mai Israel, ona inana kua ma muriai da aiwai wei ravai awari ona kauai. ³⁶ Mara tagogi oroto wavana Theudas viḡavia i vikarei ma i kauana-melei da tauna rava gaeḡaena, ma rava ai maḡa 400 nanare tauna i votaḡotaḡoi. Ma maranaina tauna i viraḡeni ana tauvotaḡotaḡo i vilamonei ma aiwai anata-puna kampa i kwa. ³⁷ Wate tauna au murina oroto Galiliei wavana Judas i ḡeta, census au marana ma rava maḡamaḡau tauna i votaḡotaḡoi, ma tauna maiteni i viraḡeni, ma ana tauvotaḡotaḡo

i vilamonei. ³⁸ Lamna aubaina a ririwemi da wei ravai ona voteretawanei! Mepa da tau i ai nola ravei, amapo ina peu. ³⁹ Wate mepa da Godei, taumi eġa tagotagogina da wei ravai ona viġaei, taumi mepa da God o viviġaviei.”

⁴⁰ Tau i Gamaliel ana babani i voteletelei. Ma Apasol i riwei da i rui, ma i wipiei i kwapui ma i viġaei da Iesu wavanei ina jima, ma i paritawanei da i nae.

⁴¹ Aubaina i aramanei da God tau i vinei da Iesu wavana aubaina ina vinuapoapoe. Anina ma Apasol ana nuaiaii Sanhedrin i opu-tawanei, ⁴² Tau i mara patapatana tempol au orana ma au numa God riwana aiaina i raraugugulei ma i viviararamana da Iesu tauna Keriso.

6

Stephen i vinei tauvoaġu

¹ Tauvitumaġana ai boru i rarata, ma au orai mai Jew Greek taubabanieina, mai Jew kampa maemaiei i viamparipariei. Tau i beubeura da ai kaikaiababa ai ġuta eġa ita tereterei. ² Anina ma Apasol 12 tauvitumaġana ai boru i raukwatuei. Ma i riwei, “Tauai Apasol ma ai nola lamna God riwana ata jimejime i ma avena mane nolana maiteni ata kaukauei. ³ Lamna aubaina au rava, awarimi rava 7 ona vinei, tau i orai Arua Vivivireina i oai ma nuaulaulai da wei nolana ina kaukauei, ⁴ Ma tau i ai nola da pari ma God riwana ava ana jime i.”

⁵ Rava anatapui wei ogatarana i vianinei, ma Stephen i vinei, Arua Vivivireina orana i oai, ma ana tumagaana God awarina i rata kauka. Ma nanare Philip, Prokoras, Nikano, Timon, Pamenas ma Nicolas tauna Jentail, Antiokei ma ini bori i vaia

ma i vikeresiana. ⁶ Ma wei ravai i neiai ma Apasol nimai tau i au tepai i terei ma i raupariei.

⁷ Anina ma God riwana i vituai ma au Jerusalem rava maḡamaḡau i Iesu i vitumaḡanei, ma nanare pirisi maḡamaḡau i vitumaḡana.

Stephen i pani

⁸ Anina ma God Stephen i viaiaini ma i vovai-virewapani da mataira ma kaua babai i kaukauei rava awari. ⁹ Wate mai Jew ḡelau i provins nununai i nei mai au Sairini, mai Alexandria, ma Silisia ma Eisia ai parinumana e ḡoreḡorei panipani *waduboi, Stephen ana ḡavia i vomairi.

¹⁰ Wate Arua Vivivireina, Stephen nuaulaula ma riwa i verei ma i bababani da tau i vigamopotai.

¹¹ Lamna aubaina tau i rava ḡelau i ḡwalai da moruei Stephen ita vibenabenamei, ma ita riwa, “Tauai a nonori Stephen, Moses ma God i vivijiboḡi.”

¹² Ma lamnei patara i viamlo-ḡaiḡaini, dogadogara ma tarawatu babadai maiteni. Anina ma tau i Stephen i vojijini ma i naiei mai Jew ai Boru Ḡeḡetelarana† awarina.

¹³ Ma tau i rava ḡelau i neiai da moruei Stephen i vibenabenamei, ma i riwa, “Wei ravana mara patapatana Tempol vivivireina ma Moses ana tarawatu i vivijiboḡi.

¹⁴ Tauai a nonori i riwa da Iesu Nasaretei tempol ina rikai ma tarawatu Moses i verevereta anapui maiteni ina virai.”

* **6:9:** Wei ravai lamna slave waduboi, marina i voterei da ana ḡoanei e mamae. † **6:12:** Sanhedrin.

¹⁵ Ma rava anatapui nai au boruna i kiakiala, Stephen i 'nana-tunutunui, ma i 'nanai da tauna naona i lalalai me anela.

7

Stephen ana babani.

¹ Anina ma Pirisi ġeġetelarana Stephen i paridadanei, “Wei viwavuna, riwa kaua bo?”
² ✧ Stephen i paribelei:

Varevareiu ma amamau, au babani ona rautaniġanei. God boruborumana noita Abraham awarina i eġa au Mesopotamia, muriai da ita nae au Haran. ³ Ma God tauna i riwei, *Am dobu ma am dam ma netawanei da ma nae dobu ana viatataiem lana.* ⁴ ✧ Anina ma Abraham Mesopotamia i netawanei ma i nae da au Haran i mae. Amana i'raġe ma au murina God Abraham i paritawanei da marina dobuna o mamae lana kampa ita mae, ⁵ ✧ Nai maranaina God eġa Abraham doa ita verei, eġa aburu dadadana! Wate i parivainuaġani, da ina verei tauna ma ana epaepaia aubaii. Nai au marana Abraham eġa natunatuna, ⁶ ✧ ma God wenanare Abraham i riwei, *Am epaepaia au dobu ġela ina mae ma ina vitaunola, nai dobuna ravai tau i ina rau-iviapoapoelei da madeġa 400 ina kwa.* ⁷ ✧ *Wate ravai, awarii e vivitaunola ana kovoġi, ma muriai mai Israel ina opui ma wei au dobuna*

✧ **7:2:** Gen 12:1 ✧ **7:4:** Gen 12:4 ✧ **7:5:** Gen 12:7; 13:15; 17:8

✧ **7:6:** Gen 15:13-14 ✧ **7:7:** Exo 3:12

ina voepaepaiu. ⁸ ✧ Anina ma God inibori parivai-nuaḡanana bagibagina Abraham maiteni i kauēi, ma maranai Isaac i tupua ma au pom vi-8-na Abraham natuna inina i bori. Muriai Isaac natuna Jacob inina i bori, ma nanare Jacob natunatuna 12 anatapui inii i bori. Wei babadai lamna tauta noinoita.

⁹ ✧ Jacob natunatuna varei Joseph i unurei ma i gimarei da ita vitaunola au Egypt, wate God tauna awarina i mae. ¹⁰ ✧ Ma ana au nuabola i gagaloei. Ma God nuaulaula i verei ma i kauēi da Egypt ai gulau nuanuana i vaia, anina ma i terei da Egypt i vibadei ma ana numa orana i vibadei. ¹¹ ✧ Ma gomara ḡaeḡaena i ḡeta au Egypt ma au Canaan, ma vinuapoapoe ḡaeḡaena i tupua. Ma noinoita eḡa ai lam. ¹² Ma maranai Jacob i nonori da au Egypt lam, ma noinoita i paritawanei au Egypt, wei ai babara naona. ¹³ Ma muriai i nae me ma wei maranai Joseph i vieḡana-melei varevareina awarii, ma kampa mai Egypt ai gulau Pharaoh, Joseph ana numa ravai i aramanei. ¹⁴ ✧ Anina ma Joseph riwa i paritawanei amana Jacob awarina ma i riwei da ana numa ravai anatapui, ai maḡa 75, ita nei au Egypt. ¹⁵ ✧ Anina ma Jacob i nae au Egypt. Tauna kampa i'raḡe ma nanare natunatuna anatapui. ¹⁶ Taubeui i naiana-melei au Shekem ma

✧ **7:8:** Gen 17:10-14; Gen 21:2-4; Gen 25:26; Gen 29:31-35:18

✧ **7:9:** Gen 37:28; Gen 39:2-21 ✧ **7:10:** Gen 41:39-41 ✧ **7:11:**

Gen 42:1-2 ✧ **7:14:** Gen 45:9-10, 17-18 ✧ **7:15:** Gen 46:1-7;

Gen 49:33

Abraham Hamor natunatuna awarii kokoaga i gimagimaraia, kampa i vimataveni.

17 ✨Maranai mara i tuġereġerei da God Abraham i paripari-vainuaġania ita kauei, ata patara i maġa guratana au Egypt. 18 Ma Pharaoh vouna au Egypt i vibada ma tauna noita Joseph eġa ita aramanei. 19 ✨Tauna amamata i morui ma i rau-iviapoapoelei, i egari da natunatui melamelai numei i viopuni da ita iraġe. 20 ✨Wei au marana Moses i tupua, tevera inanana aiaina. Amana ma alona natui i ġamoi da nawaravi tonuġa i kwa. 21 ✨Ma maranai tevera numei i tere-opunei, gulau natuna guguinina tevera i vaia ma i ġamoi da natuna. 22 Ma mai Egypt ai nuaulaula Moses i viararamani ma i virewapana, babani ma nola awarina.

23 ✨Moses ana madeġa 40 ma i nota da ita nae ana dam ravai ita raugenari. 24 Ma i 'nanai da Egyptei, Moses ana rava oina i raviravi, ma tauna turana bainei Egyptei i vunui da i viraġeni. 25 Moses i notai da ana rava ita aramanei da God tauna i paritawanei da ita agui da Egypt ita oputawanei. Wate tau i wei eġa ita aramanei. 26 Ma maratamna Moses i nae me ma ana rava ruaġa i viġaiġaiawa i 'nanai, ma i riwei, “Taumi ava ma aiwai aubaina o viġaiġaiawa?” 27 Wate ġaiawa tauvikareina Moses i vokaririei ma i riwei, “Tam aiai i terem da ma vibadelai bo tau i ai taurauetara? 28 Tam ma viraġeniu me pom Egyptei u viraġeni nanare bo?” 29 Maranai

✨ **7:17:** Exo 1:7-8 ✨ **7:19:** Exo 1:10-11; Exo 1:22 ✨ **7:20:** Exo 2:2 ✨ **7:21:** Exo 2:3-10 ✨ **7:23:** Exo 2:11-15

Moses wei i nonori tauna Egypt i ruba-tawanei ma i nae au Midian, wei eġa ana dobu wate kampa i mae. Muriai dobuna wavinena i ravaġi ma natunatuna nelarai ruaġa i tupua.

³⁰ ✧ Ma kampa i mae madeġa 40 i kwa ma BADA ana anela au mutulua ola Sinai au ġereġerena tauna awarina i eġa, inanana me ai menamenana ai aburuna rugurugui au orana i ġeġae.

³¹ Wei i 'nanai ma i baei ma i nae au ġereġere da ai arata ita tuvirevirei ma i nonori BADA i riwa i pa, ³² “Tau amamam ai God, Abraham ma Isaac ma Jacob ai God.” Maranai Moses wei i nononori i rovo kaukua ma naona i tere-govaġi.

³³ Ma BADA i riwa, “Am ae uma ma votawanei! Wei gabuna au tepana e maimairi, lamna doa vivireina ma Viaiainana. ³⁴ A inanai menanare mai Egypt, natunatu e rarau-iviapoapoelei. Ai oratou a nonori ma a ġairai da tau i ata vai-tawanei. Ma marina ma nei, Tau ana paritawanem au Egypt.”

³⁵ ✧ Stephen i riwa:

Wei Moses na tagogina, mai Israel i parivirevirei i pa, “Aiai i terem da tauai ma vibadelai ma ma rautarelai?” Moses i paritawaneiai da ita vibademi ma ita tereopunemi, anela i eġaeġa ai menamenana au poui, ana aguei. ³⁶ ✧ Ma Moses tau i Egypte i ravena-opunenei ma mataira babai ma vivirewapanai i kaukauei au Egypt, Boga lebalebarina ma ai au vaġai madeġa 40 au mutulua. ³⁷ ✧ Wei Moses-

✧ **7:30:** Exo 3:1-10 ✧ **7:35:** Exo 2:14 ✧ **7:36:** Exo 14:21; Num 14:33 ✧ **7:37:** Deu 18:15, 18

na tagogina, mai Israel i riwei, “God muriai peroveta ami damei ina paritawaneiai me tau.”
 38 ☆ Moses Israel patarana maiteni Egypt i opu-
 tawanei i vitagogiei au ola Sinai ma anela Moses
 awarina i bababani, tauna kampa noinoita
 maiteni. Ma riwa mamae-nonoana i nonori
 ma wei lamna i veredamanei tauta awarita.
 39 Wate noinoita Moses i parivirevirei ma au
 orai i gōei da ita nae me au Egypt. 40 ☆ Ma tau
Aaron i riwei, “Nai ravana Moses, Egyptei
 i taravai-opunelai, tauai eḡa ata aramanei aiwai
 awarina i tupua. Ma tauai ai god kokoitau
 ma kauei da ina rauetaraveniai.” 41 ☆ Anina ma
 bulumakau ḡaubona kokoitauna i kauei, ma pulo
 i apui awarina ma i amei ma i umei, da aiwai
 uraiei i kaukauei i vimae-ḡaeḡaeni. 42 Wate God
 tau i mae-puputei ma i voterei da ubona ma
 nawaravi ma madeḡa au mara i vimae-ḡaeḡaeni.
 Wei lamna peroveta nununai i ririweia i tupua:

*Rava mai Israel! Maranai madeḡa 40 au mutu-
 lua.*

*Taumi eḡa Tau awariu ḡamoḡamo ota vunui ma
 ota apui tapa?*

43 *Taumi ami god Molek ana numa gara ma ami
 ubona god kokoitauna Rephan o avarai.*

Kokoitau o kauei da ota vimae-ḡaeḡaeni.

*Lamna aubaina rava borui ami au dobu
 ina vainimi ma ina naiemi aueia,*

*Babilon ina netawanei da dobu au ḡelauna. (Amos
 5:25-27)*

☆ 7:38: Exo 19:1-20:17 ☆ 7:40: Exo 32:1 ☆ 7:41: Exo 32:2-6

44 ✧ Noinoita, God ana numagara, i avarai maranai au mutulua i mamae. Moses wei i voai, me God i viatataiei nanare. 45 Muriai Joshua noinoita i rau-etaraveni ma God ana numagara i avarai ma ana aguei i rui ma nai dobuna ravai i viopuni ma ai dobu ta vaia. Ma numagara kampa i mae da gulau David ana au mara.

46 ✧ God, David nuanuana i vai-kauei ma David i vibaḡa da tauna God ana numa ita voai. 47 ✧ Wate David eḡa numa ita voai ma natuna Solomon numa i voai. 48 Wate God ḡeḡetelerana eḡa rava uranei numa ita voavoai au orana ita mamae, me peroveta wariaḡa i riwa i pa:

49-50 *Aubaina Tau aiwai anatapuna au mara ma au dobu a kauei. Tapa?*

BADA i riwa, “Mara* au anikiala ma dobu aeu kareu aniterenana.

Wate numa aiwaina ona voai tau aubaiu? Eḡateni! Tau au animae-kaua mepa? Eḡa mepa! (*Isaiah 66:1-2*)

51 Ma Stephen i riwa:

Taumi orami badobadoi. Ma eḡa ota ḡoeḡoei da God ona voteletelei ma taniḡami o vopotai da ana riwa eḡa ota nononori. Taumi Arua Vivivireina o viviḡaviei me noinoimi i kaukauei nanare. 52 Noinoimi metau perovetai eḡa ita rau-iviapoapelei. Wariaḡa perovetai, God ana tauvilawana, ana nei i vinolenolei; Wate noinoimi wei perovetai maiteni i virāḡeni.

✧ 7:44: Exo 25:9, 40 ✧ 7:46: 2Sa 7:1-16 ✧ 7:47: 1Ki 6:1-38

* 7:49-50: Wei anona lamna Bada wenanare natuna i riwei, “Tam au oieu ma kiala ma am ḡavia au ae kareu ana tuvaidoedoei”

Ma marina Tauna i nei ma o vibenabenamei ma o viraḡeni. ⁵³ God ana anela i paritawaneiai da ana tarawatu noinoita i verei, wate taumi tarawatuna eḡa ota voteletelei.

Stephen ḡaimei i viraḡeni

⁵⁴ Maranai babada wei riwana i nonori ma i meji guratana ma ivoi i uta-ḡiriḡiriei Stephen awarina. ⁵⁵ Wate Arua Vivivireina Stephen orana i oai, i taepai au mara ma God ana boruma i 'nanai, ma Iesu God au oiena i maimairi. ⁵⁶ Ma i riwa, "Ona inana! Mara metaetana i wanatawanei ma Rava Natuna a inainanai God au oiena e maimairi." ⁵⁷ Marina tau i anatapui taniḡai i vopotai, i vigaragarei ma Stephen aubaina i ruba, ⁵⁸ ma i taina-opunei au doa, taon i opu-tawanei da au ririva ma ḡaimei ravina i vikarei. Ma tauviwavu ai kwama i votawanei ma tevera laragana wavana Saul au aena i vidamni. ⁵⁹ Tau i viraurauei ma tauna i raupari i pa, "BADA Iesu, aruau ma vaia! ⁶⁰ Ma aetutunei i peu ma i garara, "BADA ai ḡo'apoapoe ma nota-tawanei." Wenanare i riwa ma i'raḡe.

8

¹⁻² Ma Saul kampa da Stephen ana iraḡe i 'nanai ma i vianinei. Rava patupatutui ḡelau ana toutoui ma ana tarakwatui i nei ma Stephen taubeuna i naiei ma au kokoaga i terei.

Saul Ekalesia i rau-iviapoapoelei

Nai maranaina rau-iviapoapoe ḡaeḡaena i vikarei ekalesia awarii au Jerusalem, Ma anatapui i viruba-tomana au Judea provins ma Samaria

provins. Aposol ava au Jerusalem i mae. ³ ✧ Wate Saul i vikarei da ekalesia ai boru ita viamoai. Numa anapui i ruini ma nelara ma waivine i tainaponei ma i paritawanei au panipani-numana.

Philip au Samaria

⁴ Wate tauvitumaḡana Jerusalem i rubarubatawanei taon ma dobu anapuna inaeni ma Riwana Aiaina i raugugulei. ⁵ Ma Philip i nae au taon tagogi au Samaria ma kampa BADA ana Vinevine Keriso i raugugulei. ⁶ Maranai patarana, Philip i raraugugula i nonori, ma i 'nanai kaua babai ma mataira ḡaeḡae i kaukauei tau anapui orai taputaponei i rautaniḡana. ⁷ Tauna arua-apopoei rava maḡamaḡai au orai i egari da ana garagararai i viopuopuana, ma nanare rava maḡamaḡai gwaḡagwaḡai ma sigesigei i vilawani. ⁸ Ma nuaiai ḡaeḡaena i mae nai au taona.

Simon tauna barabaravuna

⁹ Wenanare, nai au taona oroto tagogi i mae wavana Simon, ma tauna wariḡa ava ana baravu i kaukauei ma mai Samaria i baibaiei. Ma i voepaepana-melei da tauna rava ḡaeḡaena. ¹⁰ Rava labalababa, ma wavai naenaei anapui ana babani i rarautaniḡana-kauei ma i ririwa, "Tauna, God ana rewapana e ḡoreḡorei, Rewapana Ḡaeḡaena." ¹¹ Tau i vineneḡanana-kauei aubaina mara nonoa tau Simon ana baravu i baebaei. ¹² Wate tau Philip i vitumaḡanei maranai, God ana vigulau Riwana Aiaina ma Iesu Keriso rava awari i raugugulei. Ma lamna aubaina nelara da waivine i nei da

✧ **8:3:** Act 22:4-5; 26:9-11

i babataito. ¹³ Simon maiteni i vitumaḡana ma i babataito. Ma Philip mepa i nenaē tauna kampa aubaina kaua babai ma mataira vivirewapanai i kaukauei. Tauna wei pulona i bana-kauei.

¹⁴ Maranai Apasol au Jerusalem i nonori da mai Samaria, God Riwana i vitumaḡanei, tau i Peter ma John i paritawanei awari. ¹⁵⁻¹⁶ Ma au Samaria i ḡeta ma tau i raupariei da Arua Vivivireina ita rui au orai. Aubaina tau i Iesu wavanei ava i babataito. Ma arua vivivireina eḡa ita rui. ¹⁷ Peter ma John urai tau i tepai i terei ma i raupari da Arua Vivivireina au orai i rui. ¹⁸ Maranai Simon i 'nanai da mai Samaria Arua Vivivireina i vaia, maranai Apasol urai au kolai i terei, ma Simon mane i vilololoi, ¹⁹ ma i vibaḡa i pa, "Tau maiteni nai rewapanana ma vereu da rava au kolai urau ana terei ma tau i Arua Vivivireina ina vaia." ²⁰ Wate Peter i paribelei i pa, "Anina da God tam am mane maiteni ina tawanem ai au menamenana, aubaina tam e notanotai da God ana pulo manelei ma gimarai! ²¹ Tam wei nolana au orana am gabu eḡa ita mamae, aubaina oram eḡa ita ai God au matana. ²² Am nota apoapoe ma votere-tawanei. Ma mae-tavirem BADA awarina ma ma vibaḡai da am nota apoapoe ina nota-tawanei. ²³ Aubaina a inanaim da unura oram i oai tauai awariai ma wei notai apoapoei e panipanim." ²⁴ Simon marina Peter ma John i riwei, "Aubaiu BADA awarina ona raupari da aiwai o ririwei eḡa ina tupua awariu!"

²⁵ Ma Peter ma John ai lawana ma BADA Riwana Aiaina ekalesia voui awari i raugugulei. Ma

i raugugula nae Mai Samaria ai au taon nununai da i ġeta au Jerusalem.

Philip ma Ethiopiei

²⁶ Mara tagogi BADA ana anela, Philip i riwei, “Ma vokaukaua ma ma nae au rauanaġei, etanai au Jerusalem da e ġaiġaira au Gaza.” (Wei etanaina lamna au mutulua). ²⁷ Anina ma Philip i vokaukaua ma i nae. Ma wei au etanaina oroto Ethiopiei i ’nanai. Tauna mai Ethiopia ai kwin Kandake, ana mane taupainina. Wei orotona i nae au Jerusalem God viborumana aubaina, ²⁸ ma i nena-me ana au dobu. Ma ana au chariot i kiala ma wariāġa peroveta Isaiah buka i girugirumia i ’aiavi. ²⁹ Ma Arua Vivivireina Philip i riwei, “Ma nae ma chariot au ririvana ma babara-nae.” ³⁰ Anina ma Philip i ruba chariot au ririvana ma i nonori badana peroveta Isaiah ana buka i ’aiavi. Ma Philip i paridadana, “Aiwai e iaiavia e araramanei bo eġa?” ³¹ Orotona i paribelei, “Menanare ana ’ramananei mepa da rava eġa ita parivai-araramaniul!” Ma Philip i vibaġai da i ġeta da au ririvana i kiala. ³² Buka au orana, wei riwana i ’aiavi,

*Tauna i taravaina-naiei me sipu viraġenana aubaina
me sipu natuna e genugenuana maranai
aparana e boribori,
tauna eġa aiwai ita latoni.*

³³ *Tauna i vijiboġi ma i vinimalamalai ma eġa
ita kauana-kauai awarina.
Aiai ana epaepaia ina babaniei.*

Aubaina ana mara au dobu i vaitawanei.” (Isaiah 53:7-8)

³⁴ Ma orotona, Philip i paridadanei, “Isaiah e babaniana-melei bo rava gēlauna e babaniei?”
³⁵ Ma Philip, wei riwana awarina i vikarei ma riwa gēlaui maiteni ma Iesu Riwana Aiaina i viararamani. ³⁶ Ma i nēnae da waira i ’nanai ma Ethiopiei i riwa, “Ma inana waira noi, aiwai aubaina da eḡa ana babataito?” ³⁷ * ³⁸ Badana, chariot taurubeina i riwei, “Chariot ma vojijini” Ma tauna ma Philip i gaira waira au orana ma Philip, badana i babataitoi. ³⁹ Maranai wairei i gēta, BADA Aruana maratagogi Philip i vai-tawanei ma turana eḡa ita inana-melei, ma ana morelanana i nae ana au dobu. ⁴⁰ Wate Philip au Asotus i raueḡa ma dobuna i naeni ma Riwana Aiaina i raugugulei da au Caesarea taon i gēta.

9

Saul i vitumaḡana

¹ Wate Saul amapo da i mejimeji ma i ḡoeḡoei da BADA ana tauvitumaḡana ita viraḡeni. Ma i nae Pirisi ḡetelarana awarina, ² ma i vibaḡai da pepa ita girumi boru-numai babadai awarii au Damaskas da rewapana ita verei da Iesu ana etanai tauvitumaḡanai, nelara ma waivine ita pani ma ita nei ai au Jerusalem. ³ Ma Saul, Damaskas i tuḡereḡerei, nanare ma lalalaina marei i gairai da tauna i ravilalai. ⁴ Tauna i peu au doa ma pona

* **8:37:** Buka wadubo nonoana vs 37 eḡa ita mamae.

i nonori awarina i babani i pa, “Saul, Saul! Aiwai aubaina e rarau-iviapoapoeleu?”

⁵ Saul i paridadana, “Tam aiai bada?”

Ma pona i paribelei, “Tau Iesu, tauna e rarau-iviapoapoele! ⁶ Marina ma vomairi ma ma rui au Damaskas, ma kampa aiwai ina riwem ma kauai.”

⁷ Nelara Saul maiteni i nena e i mairi kwakwa, ana gamopotai, tau i pona i nonori wate ega aiai ita inana. ⁸ Ma Saul au doa i matamatave i vomairi ma matana i kala, wate ega aiwai ita inana. Ma ana rava i raunimavoai ma i taravaina-naiei au Damaskas. ⁹ Ma au pom tonuga ega ita inana, ega ita am bo ita uma.

¹⁰ Au Damaskas tauvitumašana i mae wavana Ananias. BADA ana au inana i viatataiei i pa, “Ananias!”

Ma i paribelei, “Bada, tau weka!”

¹¹ BADA tauna i riwei, “Etanai wavana Etanai Jijimanina ma vaia da Judas ana au numa, kampa oroto Tarsusei wavana Saul ma baiei. Tauna marina e raraupari awariu. ¹² Ma ana au inana i ’nanai oroto wavana Ananias i nei awarina ma urana au inana i terei da ita inana-me.”

¹³ Wate Ananias i paribelei, “Bada, rava mašanašau i riweu da wei ravana ana kaua i apoapoe kaua tauvitumašana awarii au Jerusalem! ¹⁴ Ma weka i nei pirisi gaegaei ai rewapanei da aiai wavam e viviborumei ina pani.”

¹⁵ Wate BADA, Ananias i riwei, “Ma nae! Tau a vinei da aubaiu ina vitaunola ma wavau ina jimei, Jentail ma ai gulagulai awarii ma nanare mai Israel awarii. ¹⁶ Tau ana viatataiei da aubaiu

ina jima ma rau-iviapoapoe g̃aẽgaena ina nei awarina.”

¹⁷ Anina ma Ananias i g̃eta au numa ma i rui. Ma urana Saul au tepana i terei ma i riwei, “Vareiu Saul, BADA Iesu, Tauna au etanai awarim i ẽga maranai weka u nenei, i paritawaneu awarim da ma inana me ma Arua Vivivireina oram ina vioai.”

¹⁸ Maratagogi purapura inanana me iana wenavina au matana i peu, ma tauna, inana me. Ma i vomairi ma i babataito. ¹⁹ Ma i am ma ana rewapana i vai-melei.

Saul au Damaskas i raugugula

²⁰ Ma tauna maratagogi i nae ma pari au numai i raraugugula da Iesu anina God natuna. ²¹ Taiu aiavoi da Saul i nonori i ba kua ma taiu ava i babani vivira i pa, “Wei ravana tagogina, rau-iviapoapoe g̃aẽgaena Iesu ana tauvitumaḡanai awarii i kaukauei au Jerusalem bo? Tauna i nei weka nolana tagogina aubaina da tauvitumaḡana ita pani ma ita naiei Pirisi babadai awarii bo.” ²² Wate Saul ana raugugula i virewapana kua ma lamnei mai Jew au Damaskas i aramanei da Iesu anina Keriso, Vinevinena, ma lamna aubaina ana babani ẽga ita parivirevirei.

²³ Ma au pom biaḡa au murina Jew babadai i viogatara da Saul ita viraḡeni. ²⁴ Mai Jew marai ma waguvarai taon garina au metaetana i vipaipai da Saul ita viraḡeni. Wate Saul ai ogatara riwana i nonori. ²⁵ Ma waguvarai tauvitumaḡanai ḡelai ai bada Saul i taravaini ma iriga g̃aẽgaena au orana i poai ma gavogavo aburuna taon au garina, kampa ḡuravei i tere-ḡairei au doa ma i ruba.

²⁶ Saul i ġeta au Jerusalem ma maranai i ġoei da tauvitumaġanai ai au boru ita rui. Wate tau i roveoi ma eġa ita vitumaġanei da tauna Iesu ana tauvotaġotaġo. ²⁷ Wate Barnabas tauna i taravaini ma i naiei Apasol awarii, ma i riwei menanare au etanai Saul, BADA i 'nanai ma aiwai awarina i babaniei. Ma menanare au Damaskas ana tepatorana i raugugula Iesu wavanei. ²⁸ Anina ma tau Saul i taravaini ma maiteni i mae ma Jerusalem i naeni ma ana tepatorai i raugugula BADA wavanei. ²⁹ Ma nanare Saul mai Jew pona Greek taubanieina maiteni i babani ma i viparipariġai, ma tau i viogataru da tauna ita viragēni. ³⁰ Maranai tauvitumaġana ġelau wei i nonori, ma Saul i taravaina-naiei au Caesarea da i paritawanei au Tarsus.

³¹ Anina ma ekalesia au Judea, Galili ma Samaria ana nuaubaii i mae. Ma Arua Vivivireina ana aguei ekalesia ai tumaġana i vovai-virewapani, Ma ai boru i rarata, ma tau BADA i vivirana-kauei.

Aeneas ma Dorkas

³² Nai maranaina Peter dobu maġamaġau i naeni, ma God ana tauvitumaġana awarii i ġeta au Lidda. ³³ Kampa oroto wavana Aeneas i nelaġai, tauna gwaġagwaġana madeġa 8 ana au aravi i matave. ³⁴ Peter i riwa, “Aeneas, Iesu Keriso i vilawanim! Ma vomairi ma am aravi ma noui!” Ma maratagogi i lawana. ³⁵ Anina ma rava maġamaġau au Lidda ma Sharon wapuna melagaina, i mae-tavirei BADA awarina.

³⁶ Au Joppa tauvitumaġana tagogi wavana Tabitha (Greek ponanei lamna Dorkas) tauna marana patapatana kua maġamaġau aiaii

i kaukauei molamokai aubaii. ³⁷ Wei marana tauna idoria ma i'raġe ma tupuana i oġai ma numa vatavatara au aidamo, i vimataveni. ³⁸ Lidda, lamna Joppa au ġereġerena ma maranai tauvitumaġana i nonori da Peter au Lidda, tau i rava ruaġa i paritawanei da Peter i egari i pa, "Laġilaġina ma nei!"

³⁹ Ma Peter tau i maiteni i nae da i ġeta ma i taravaina-ruiei au numa vatavatara. Kaikaiababa maġamaġau ana toutoui Peter i mairi kwaviviroi. Maranai Dorkas lawalawaina ma kwama da gara i popoia Peter i viatataiei.

⁴⁰ Wate Peter anatapui i vibaġai da i opu au doa, ma ae-tutunei i mae-ġaira ma i raupari, ma taubeu i riwei, "Tabitha, ma vomairi!" Tabitha matana i kala ma maranai Peter i 'nanai, i vomairi da i kiala.

⁴¹ Peter urana i viloloi ma i voaġui da i vomairi. Ma tauvitumaġana anatapui ma kaikaiababa maiteni i kwatueiai, ma wavine lawalawaina tau i verei.

⁴² Ma wei riwana dobu Joppa i naeni ma rava maġamaġau i Iesu i vitumaġanei. ⁴³ Peter au Joppa i mae au pom biaġa nanare Simon ġamoġamo opina taurauġaroġaroeina ana au numa.

10

Peter ma Cornelius

¹ Au Caesarea oroto* wavana Cornelius, tauna mai Italy sorodia boruna ai bada. ² Tauna rava jġimanina ma patupatutuna, ma ana numa ravai maiteni God taurauduneleina. Ma molamolakai i paipaina-kauei ma marana patapatai

* **10:1:** Wei ravana jentail.

i raraupari God awarina. ³ Au bigai tagogi 3 oklok nanare i raraupari ma ana au inana, God ana anela au aiaina i 'nanai, i nei awarina ma i riwa, "Cornelius!"

⁴ Cornelius ana rovona anela i 'nana-tunutunui ma i riwa, "Au bada, menanare!"

Ma anela i paribelei, "Am pari ma am verena molamolakai awarii, i ġeta God awarina me pulo apuapunana ġabuna. ⁵ Ma marina nelara ġelau ma paritawanei au Joppa ma ravana wavana Simon wavana ġelauna Peter ina taravainiai. ⁶ Tauna rava wavana Simon, ġamoġamo opina taurauġaroġaroaina awarina e mamae gera au ririvana."

⁷ Maranai anela i nae, Cornelius ana taunola ruaġa i ġoreiai, ma ġelauna lamna sorodia, tauna ana tauvipaipai, tauna God tauvitumaġaneiana.

⁸ Tauna aiwai anatapuna tau i riwei ma i paritawanei au Joppa.

Peter Cornelius i raugenari

⁹ Maratomna au benai nanare maranai nelarai Joppa i tuġereġerei, Peter i ġeta numa au tepana da ita raupari. ¹⁰ Ma am i 'raġe ma i ġoei da aiwai ita ani, maranai tau lam i vovokaukauei, ma Peter matanei rauboni i 'nanai. ¹¹ I 'nanai mara i wanatawanei ma purapura inanana me puru ġaeġaena au adana 4 i vojijini ma marei i tere-ġaireiai au dobu. ¹² Au orana lamna sia tapuna ma tapuna, tetetei me mota ma kiu au aidamo lavelavei. ¹³ Ma pona i riwa, "Peter ma vomairi, ma viraġena ma ma am!"

14 Wate Peter i paribelei, “Eġa! Lamna eġa melanai ana kauēi. Eġa melanai lam viviġana ata am-dadani.”

15 Wate pona i babani me, “Aiwai God i viviaiainia, eġa ma riwa da i apoapoe.”

16 Mara tonuġa wenanare i tupua ma me marana puruna i ġaiana-melei au mara.

17 Ma Peter aiwai i ’nainanai anona i vinua-notenotei, nanare ma Cornelius nelara i paripari-tawanei, tau Simon ana numa i nelaġai ma i ġeta ana au metaeta. 18 Tau i paridadana, “Weka rava wavana Simon-Peter e mamae bo eġa?”

19 Peter amapo da wei i vivinua-notenotei maranai Arua vivivireina i riwa, “Simon, nelara tonuġa e baibaie! 20 Lamna aubaina ma vomairi ma ma ġaira au gabaura, eġa ma geduai, aubaina tau a paritawanei awarim.”

21 Peter i ġaira ma awarii i riwa, “Taumi tau o baibaieu bo, Ami ġoana aiwai?”

22 Ma nelarai i paribelei, “Tauai Cornelius mai Rome ai sorodia ai bada i paritawanelai, tauna rava jijimanina ma God tauvoepaepana, ma mai Jew maġamaġau tauna e vivivirei. Anela vivivireina i riwei da uta nei ana au numa da aiwai u araramanei uta riwei.” 23 Ma Peter nelarai i ġorei da i rui au numa ma kampa i matave.

Peter Cornelius ana au numa

Ma maratamna anatapai i nae, Tauvitumaġana ġelau i au Joppa maiteni i vomairi. 24 Ma au pom ġelauna tau i au Caesarea i ġeta. Cornelius tau i paipaini, ma ana numa ravai ma ana rava i ġorei da i nei. 25 Ma maranai Peter i ruirui au

numa, Cornelius Peter i 'nanai ma i mae-ġaira au ae karena ma ana vivirana i raudune. ²⁶ Wate Peter tauna i voepai ma i riwa, “Ma vomairi, Tau rava ota me tam.”

²⁷ Peter ma Cornelius i bababani ma i ruirui au numa. Ma i 'nanai da patara tauna i paipaini. ²⁸ Peter tau i riwei, “Taumi o aramana-kauei da tauta mai Jew ata tarawatu e viviġaeta da Jentail maiteni tana mae-gogona bo tana raugenari. Wate God i viatataieu da eġa rava ana ġorei rava apoapoen bo miramirana. ²⁹ Lamna aubaina maranai u vibaġaiu da ata nei, Tau au nota aiainei a nei. Tau ata pari-dadanem, Marina ma riweu aiwai aubaina au riwa u paritawanei?”

³⁰ Cornelius i paribelei, “Au benai wenanare au pom 4 marina i kwa, au numa a raraupari, nanare ma rava ana gara ararapoirina ma namanamirina au naoiu i raumairiei. ³¹ Ma i riwa, ‘Cornelius! God am pari i nonori ma am verena molamolakai awarii i vinuaiaiei! ³² Ma nelara ma paritawanei au Joppa da Simon e ġoreġorei Peter awarina. Tauna Simon, ġamoġamo opina taurauġaroġaroena ana au numa e mamae.’ ³³ Lamna aubaina da am riwa laġilaġina ava a paritawanei, ma i ai da tam u nei. Tauai anatapuiai marina weka God au matana a vivipaipai da BADA aiwai i riwem ana nonori.”

Peter ana babani

³⁴ Ma Peter babani i raukarei, “Marina a inana-kauei da God rava anatapui e vaivaia da tagogina. ³⁵ Wate dobu dobuai ravai God e vivivirei ma kaua aiaii e kaukauei, Tauna wei ravai e ġoeġoei, ³⁶ Taumi o aramanei God Riwana Aiaina i paritawanei mai Israel awarii da rava ina mae-kaua God maiteni,

maranai Iesu Keriso ina vitumaḡanei ma tauna ai lawana ina vibadei. ³⁷ Taumi o aramanei Iesu aiwai i kauei Judea au anatapuna, au Galili i vikarei maranai John babataito ai kaua i raugugulei. ³⁸ God Arua Vivivireina ma rewapana Iesu Nasaretei i verei da dobu maḡamaḡaui i naeni ma kaua aiai i kaukauei, ma rava au orai arua apoapoe i ruiruini, i vilawani.

³⁹ —Aiwai anatapuna au Judah provins ma au Jerusalem i kaukauei tauai anatapuiai a vimatemei ma a bababaniei. Tauna au korosi i tutui da iraḡe. ⁴⁰ Wate God tauna iraḡelei i voepa-mei aupom au vitonuina ma i kauei da ḡelaui awariai i eḡa. ⁴¹ Eḡa rava maḡamaḡaui tauna ita inanai, anina tauvimatamata i vinevinei awari ava i ḡeta. Lamna tauai maiteni a uma ma am ana vomairi au murina. ⁴² Ma i egariai da dobu au anatapuna ana raugugula ma ana jima da God Iesu i vinei da rava anatapui lawalawaii ma irairaḡei ina rauetarei. ⁴³ Peroveta anatapui i jimei da maranai rava Iesu i vitumaḡanei, Tauna wavinei God taui ai ḡo'apoapoe ina vaitawanei.”

⁴⁴ Maranai Peter i bababani ma Arua Vivivireina i ḡairai ma rava i raurautaniḡana i vioai. ⁴⁵ Ma mai Jew Joppei i nenei Peter maiteni, i ba kaua maranai God Arua Vivivireina i paritawana ḡairei Jentail awarii. ⁴⁶ Au baina mai Jew i nonori taui pona tapunei i bababani ma God i vivimae-ḡaeḡaeni. Anina ma Peter i riwa, ⁴⁷ “Taui Arua Vivivireina i vaia me tauta. Wei lamna aubaina eḡa aiai ina viḡaeta da wei ravai tana babataitoi.” ⁴⁸ Ma taui Cornelius ana numa ravai maiteni ma ana

rava ḡelau i Iesu Keriso wavanei i babataitoi, ma tau i Peter i vibaḡai da maiteni ita mae mara aburuna.

11

Peter ana babani

¹ Aposol ma tauvitumaḡana au Judea provins i nonori da Jentail maiteni God riwana i nonori ma i vitumaḡana. ² Ma maranai Peter i ḡeta me au Jerusalem tauvitumaḡana mai Jew ḡelau tauna i eni i pa, ³ “Tam Jentail ai au numa u rui, ma maiteni u am!”

⁴ Anina ma kua menanare i tuputupuanei anat-apuna Peter tau i parivere: ⁵ I riwa i pa:

Maranai a raraupari au Joppa ma matauei kua a inanai, ma purapura inanana me puru ḡaēḡaena adana 4 i vojijini ma marei i tere-ḡaireiai awariu. ⁶ Au orana a inana lamna ḡamoḡamo maramaraḡamai ma moduei, tetetei me mota ma kiu au aidamo lavelavei. ⁷ Ma pona a nonori i pa, “Peter ma vomairi, ma viraḡena ma ma am!”

⁸ Tau a paribelei, “Eḡa! Lamna eḡa melanai ana kauēi. Eḡa melanai lam vivigana ata amdadani.”

⁹ Wate pona marei mara viruaina i babani, “Aiwai purapurana God i riwa da i ai, tam eḡa ma riwa da i apoapoe.” ¹⁰ Mara tonuḡa wenanare i tupua, ma puruna i ḡaiana-melei au mara.

¹¹ Nai maranaina mai Caesarea ai rava tonuḡa i paripari-tawaneiai, au metaeta i raumairiei. ¹² Ma Arua Vivivireina i riweu da eḡa aiwai ana notai ma orau taputapunei ana nae. Mai Joppa tauvitumaḡana 6 maiteni a nae ma ravana ana au

numa a rui. ¹³ Cornelius i riwelai da anela awarina i eġa, ma i riwei, “Rava ma paritawanei au Joppa da rava wavana Simon Peter ina neiai.”

¹⁴ Tauna wei riwana ina neiai ma lamnei tam ma am numa ravai maiteni ina vilawanimi.

¹⁵ Ma babani a raukarei ma Arua Vivivireina i ġairai da tau i vioai me au naona awarita i tupua nanare. ¹⁶ ✧ Anina ma Iesu aiwai i ririwei a notai, “John wairei i babataito, wate taumi Arua Vivivireinei ina babataitoimi.” ¹⁷ Inanana au aiaina da God Jentail pulona tagogina i verei, me tauta i verevereta maranai Iesu Keriso ta vitumaġanei, ma tau ai ai da God ata viġaei?

¹⁸ Tau i vigamopotai maranai wei i nonori, ma God i viborumei i pa, “Riwa kaua da God Jentail maiteni i vianinei da ina rupena ma ina lawana.”

Ekalesia au Antiok

¹⁹ ✧ Ekalesia ġelau i rau-iviapoapoe i rovoei maranai Stephen i viraġeni ma i vilamonei au uama. Ġelau i ruba nae au Phonisia, au Saipras ma Antiok, ma kampa Iesu Riwana Aiaina i raugugulei mai Jew ava awarii. ²⁰ Wate ekalesia ġelau mai Saipras ma mai Sairini i nae au Antiok Jentail awarii ma Iesu Riwana Aiaina i raugugulei. ²¹ BADA ana rewapana tau i au orai i mae ma Jentail maġamaġau i vitumaġana ma i mae-tavirei BADA awarina.

²² Wei riwana i ġeta ekalesia awarii au Jerusalem, ma tau i Barnabas i paritawanei au Antiok. ²³⁻²⁴ Maranai i ġeta ma i ’nanai da God

ravai i viaiaina-kauei, tauna i vinuaiiai ma i egari da BADA awarina ina vipatutu orai taputapunei. Barnabas tauna rava aiaina, Arua Vivivireina orana i oai ma ana tumaḡana i rata, ma God ana aguiei, i rauguga ma rava maḡamaḡau i taini BADA awarina.

²⁵ Ma Barnabas i nae au Tarsus da Saul ita baiei.

²⁶ Ma i nelaḡai ma i neiiai au Antiok, ma kampa tauvitumaḡana maiteni i mae madeḡa tagogi i kwa, ma patara ḡaeḡaena awarii i viararamana. (Weka au Antiok lamna i vikarei da tauvitumaḡana i viḡorei Kerisiana)

²⁷ Wei au marana peroveta ḡelau Jerusalem ei i ḡairai.

²⁸ ✧ Peroveta tagogi wavana Agabas i vomairi ma God ana rewapanei i vieḡa da gomara e nenei au naonii dobu au anatapuna (Caesar Claudius ana vibada au marana gomarana i nei).

²⁹ Tauvotaḡotaḡo au Antiok i vianina da tau i ava ita kauana-guratei da mane vounaina ita kauei da ai rava ekalesia au Judea ita voagui.

³⁰ Tau i nanare i kauei ma manena Barnabas ma Saul au urai i terei ma tau i ekalesia ai babada au Jerusalem i verei.

12

James i viraḡeni ma Peter i pani

¹ Lamna maranai, gulau Herod Agrippa* i raukarei da ekalesia ḡelau i rau-iviapoapoelei.

² James, John tuana uana sodei i bori-tuini. ³ Ma maranai Herod i 'nanai da mai Jew wei kauana

✧ **11:28:** Act 21:10 * **12:1:** Tauna gulau Herod 1 ḡoḡana.

i vinuiaiaiei, ma ana sorodia i egari da Peter maiteni ita pani da au pani numana ita terei. Wei kauana Palawa Bagibagina ana au torela i tupua. ⁴ ✧ Ma Peter i pani ma au pani numana i terei ma sorodia 16 tauna i paini. [Sorodia 16 i terei da borui 4 ma i vipaipai.] Herod i gōei da Peter ita vojijini da raḡona torelana au murina ma au deba ita rauetarei. ⁵ Ma lamna aubaina Peter au pani numana i vojijini mara aburuna. Wate ekalesia i raraupari guratana God awarina Peter aubaina.

Peter pani numanei i tere-opunei

⁶ Ma nai waguvaraina, ma maratomna da Peter ita rauetarei, Peter sorodia ruaḡa au poui i matamatave. Urana seinei i raḡini sorodia ruaḡa au urai, ma sorodia ḡelau i metaeta i vipaipai.

⁷ Maratagogi BADA ana anela i eḡa ma pani numana i ravilalai. Ma Peter i vogugui da matana i kala ma i riwei, “Laḡilaḡina ma vomairi!” Ma sein au urana i dabarara. ⁸ Ma Peter i riwei, “Ma vigara ma ae uma ma oteni.” Ma nanare i kauēi. Ma i egari, “Am kwama potopotona ma oteni ma ma votaḡotaḡoiu.”

⁹ Peter anela i votaḡotaḡoi da pani numana i opu-tawanei, wate eḡa ita aramanei anela aiwai i kaukauēi, tauna i notai i rarauboni. ¹⁰ Taui, sorodia boruna ruaḡa au doa i netawanei, da i opu au metaeta iramei, wei e opuopu au taon. Metaeta ainelana i wanatawanei aubaii ma i opu. Taui etanai tagogi i ḡairani ma maratagogi anela tauna i voterei.

¹¹ Peter ana nota i nememei ma i riwa, “Wei anina riwa kaua! BADA ana anela i paritawaneiai

✧ 12:4: Exo 12:1-27

da Herod au urana i vaitawaneu, da mai Jew aiwai i notanotai da ita tupua lamna eġa ita tupua.”
 12 Maranai ana nota i nememei tauna i nae Mary ana au numa. (Mary lamna John alona. John wavana ġelauna Mark). Kampa rava maġamaġau i vitagogiei ma i raraupari. 13 Peter au metaeta i raupewapewa ma taunola wavana Rouda i nei da metaeta ita votawanei. 14 Ma Peter ponana i nonori ma i aramanei da tauna, ma i vinuaiai guratana da eġa metaeta ita votawanei ma i ruba-rui da i vinolanola i pa, “Peter au metaeta e maimairi!”

15 Wate tau i eġa ita vitumaġanei ma i riwei, “Tam ma bubua!” Wate tauna i riwa bagibagi. Ma tau i riwa, “Nai Peter ana anela.”

16 Wate Peter i rarau-pewapewa ma maranai tau i metaeta i votawanei ma i ’nanai da tauna, tau i orai i auepai.

17 Peter urana i voepai da rava i genuana ma i riwei menanare BADA pani numanei i tere-opunei. Ma i riwei, “James† ma ekalesia ġelau i wei ona pariveri.” Ma Peter i nae au dobuġela.

18 Maranai mara i tom kampa au pani numana nuabola ma vinuanaina ġaeġaena i peu sorodia awarii da aiwai i tupua Peter awarina 19 Herod, ana sorodia i egari da Peter ibaiei wate eġa ita nelaġai. Lamna aubaina sorodia 16 i etarei ma i viraġeni. Muriai Herod Judea i netawanei ma i nae au Caesarea da ita mae mara aburuna.

Herod iraġe

† 12:17: Iesu ana tevera

²⁰ Marina Herod amlona i gaiḡai kaua Taia ma Sidon ravai awarii, lamna aubaina tau i ana borui i nei da Herod maiteni wei i babaniei. Tau i Herod ana taunola gaeḡaena Blastus, i taravaini da ita voagui. Tau i rom i vibaḡei Herod maiteni. Aubaina ai lam Herod ana do bu ei i nenei. ²¹ Ma marana i ḡetai da Herod maiteni ita viboru ma tauna ana vigulau garana i vigarei ma ana au anikiala i kiala ma awarii i babani. ²² Ma patara ana babani i nonori ma i logoi i pa, “Wei lamna god e bababani ma eḡa rava!”

²³ Maratagogi BADA ana anela Herod i vipeuni au doa ma motamota orana i ani da i raḡe, aubaina tauna rava ai voepaepa i vinuaiaiei ma eḡa rava ita riwei da BADA ita voepaepai.

²⁴ Ma ekalesia BADA riwana i raraugugulei ma rava maḡamaḡau i nenei BADA awarina ma ekalesia i rarata. ²⁵ Maranai Barnabas ma Saul ai nola au Jerusalem i vikwai, tau i John-Mark i taravaini da maiteni i nei au Jerusalem.

13

Barnabas ma Saul i viaiaini ma i paritawanei

¹ Kerisiana au Antiok au orai peroveta ma taugiu wavai wenanare, Barnabas, Simeon (e ḡoreḡorei Gawara), Lusias Sairinie i, Manaen (Tauna gulau Herod Antipas maiteni i rata tagogi), ma Saul. ² Mara tagogi maranai tau i ujiuji ma BADA i vovoepaepai ma Arua Vivivireina i riwa i pa, “Tau, Barnabas ma Saul a vinei, ona tereriei au nola aubaina.” ³ Anina ma uji ma pari au murina

taui urai Barnabas ma Saul au tepai i terei ma God ruaḡai i viaiaini ma i paritawanei.

Au Saipras

⁴ Ma Arua Vivivireina Barnabas ma Saul i paritawanei da i ḡaira au Selusia ma kampa i amkuka damana au bonabona Saipras. ⁵ Ma au Salamis i ḡota ma i nae mai Jew ai au boru numana ma God riwana i raugugulei. John-Mark taui maiteni i nae da ai tauagu.

⁶⁻⁷ Taui bonabonana i kwaviviroi da au Paphos taon i ḡeta. Weka Jew ei barabaravuna ma peroveta morumoruna i nebelei wavana Bariesu. Tauna bonabonana ana gavena Segius Paulus i vituranei, Segius Paulus rava nualaulaunana ma i ḡoei da God ana babani ita nonori ma lamna aubaina Barnabas ma Saul i rauḡoreiai. ⁸ Wate barabaravuna Bariesu (Greek ponanei lamna Elimas) Saul ma Barnabas i viḡaviei da gavena ana tumaḡana ita viapoapoeni. ⁹ Saul wavana ḡelauna Paul, Arua Vivivireina orana i oai ma barabaravuna matana i 'nana-tunutunui. ¹⁰ Ma i pa “Tam Satan natuna ma kua aiaii ma jijimani tauviapoapoenina! Tam morumoru kaukauam ma gwalagwalamerum. Ma amapo da BADA ana kua ma voviravirai da moru. ¹¹ Ma marina BADA urana ina kovoḡim da matam ina apoapoe mara aburuna ma eḡa madeḡa lalalaina ma inanai.” Maratagogi matana i vinawanawa ma i gimtona ma nare da were i voladaḡa-nae da rava au urana ita vojijina.

¹² Maranai gavena i 'nanai aiwai i tupua ma i vitumaḡana, aubaina tauna BADA ana viararamana i bana-kauei.

Paul God Riwana Aiaina i jimejime i au Antiok taon au Pisidia

¹³ Paul ana rava maiteni Paphos i voterei ma i amkuka damana au Perga taon au Pamphilia provins, Ma weka John-Mark tau i voterei ma i naeme au Jerusalem. ¹⁴ Perga i voterei ma i rui da au Antiok taon au Pisidia provins. Ma au Sabate i rui au boru-numana ma i kiala. ¹⁵ Ma rava ḡelau, Moses ana tarawatu bukana ma peroveta ḡelau ai buka i 'avi, ma babada riwa i paritawanei Paul ma Barnabas awari i pa, "Varevareiu! Mepa da awarimi nota aiwai da ota voagui ai lamna marina ona ḡei da ona babaniei."

¹⁶ Paul i vomairi ma urana i voepai da rava i genuana ma babani i vikarei i pa:

Mai Israel ma taumi eḡa mai Jew ai God tau-viborumaina, ona rautaniḡaneu! ¹⁷ ✧ Mai Israel ai God noinoita i vinei, mā i vimaurai ai au mae au Egypt, ma ana rewapana ḡaeḡaenei dobunei i taravaina-opunei. ¹⁸ ✧ Madēḡa 40 au mutulua ami kaua apoapoei ami beura ma ami gunura anatapui am-iauei. ¹⁹ ✧ Dam ḡaeḡaei 7 i vipupui au Canaan ma dobuna mai Israel i verei da i viḡariana-nonoei. ²⁰ *Wei anatapuna madēḡa

✧ **13:17:** Exo 1:7 ✧ **13:18:** Num 14:34 ✧ **13:19:** Deu 7:1

* **13:20:** (a) Jdg 2:16; (b) 1Sa 3:20

450 au orana i tupua. Wei au murina God tau-rauetara† i terei da tau i vibadei da peroveta Samuel ana mara. ²¹ ‡Anina ma rava God i vibaġai da gulau ita verei. Ma God Saul, Kish natuna Benjamin ana damei i terei; ai gulau da madeġa 40 i kwa. ²² §Ma God Saul i tere-opunei ma David i terei ai gulau. Ma wenanare i riwa i pa, “Tau a aramanei da David, Jesse natuna orau ana rauoġara, ma au ġoana anatapuna ina kauiei.”

²³ ¶Muriai me God i parivainuaġani nanare, Mai Israel ai Tauvilawana, Iesu David ana damei i nei. ²⁴ ✧Muriai da Iesu ita nei, John mai Israel anatapui awari i jima da ai ġo’apoapoe ina voterei ma ina mae-tavirei God awarina ma ina babataito. ²⁵ ✧Ma John ana nola au damona i riwa, “Taumi o notanotai da tau Tauvilawana bo? Eġa! Tau eġa tauna. Wate ona rautaniġana, rava au muriu e nenei tauna i ġetelara, tau eġa tagotagogina da ana ae uma ġuravana ana rupeni.”

²⁶ ¶Varevareu - Abraham natunatuna ma taumi Jentail God tauviviborumeina, God tauta awarita, kwakokwakoi vilawanai riwana i paritawaneiai! ²⁷ ¶Mai Jerusalem ai babada maiteni God ana Tauvilawana i vinua-nainei, ma lamnei Iesu i kovoġi, Peroveta wei lamna i jimejime i au Sabate marana patapatana. ²⁸ ✧Tau i eġa ana apoapoena aiwai ita nelaġai

† **13:20:** Wei ravai lamna ai ġavia babadai ma ai tauravena ma taurauetara *Judge*. ‡ **13:21:** (a) 1Sa 8:5; (b) 1Sa 10:21 § **13:22:** (a) 1Sa 13:14; (b) 1Sa 16:12 ✧ **13:24:** Mrk 1:4 ✧ **13:25:** Mrk 1:7 ✧ **13:28:** Mrk 15:13-14

da Iesu ita viragēni, wate Pilate i vibaḡai da ita viragēni.

²⁹ ✧ Maranai rava ai babada maiteni, ai nuabola Iesu awarina i kauana-paiei me peroveta i ririwei nanare, ma tupuana au korosi i tereḡairei ma au guba i vimataveni. ³⁰ Wate God Iesu iraḡelei i vovaimairini. ³¹ ✧ Ma au pom maḡamaḡau Iesu tau i maiteni au Galili da i ḡeḡae au Jerusalem awari i eḡa. Wei ravai marina e vivimatamata rava awarii.

³² Marina tauai Riwana Aiaina a paripariveremi. Wei parivainuaḡanana wariḡa noinoita awari i kauei. ³³ Ma God nanare i kauei tauta eda muri aubaita, da Iesu iraḡelei i vovaimairini, au Psalm viruaina wenanare I girumi,

Tam natu.

Amadodo Tau a viamanem. (Psalm 2:7)

³⁴ God Iesu iraḡelei i vovaimairini da eḡa tupuana ina buda. Me i girugirumi nanare i pa,
Au viaiaina vivivireina David a parivainuaḡani tam ana verem. (Isaiah 55:3)

³⁵ Psalm ḡelauna wenanare i girumi,
A ramanei da Tam am Messiah-Tauvilawana tupuana eḡa au kokoḡa ma voterei da ina buda. (Psalm 16:10)

³⁶ Maranai David i mamae ma God ana nola i kauei ma i raḡe, ma amamana maiteni i doboi ma tupuana i buda. ³⁷ Wate God Iesu iraḡelei i vovaimairini ma tupuana eḡa ita buda.

³⁸⁻³⁹ Lamna aubaina au rava, ona aramanei da Iesu awarinei God ami ḡo'apoapoe ina notatawanei. Rava anatapui da Iesu e vivitumaḡanei,

ai gō'apoapoe e notanota-tawanei ma ai viturana e viviaiaini. Wei Moses ana tarawatu ega ita kaukauei. ⁴⁰ Ona paina-melemi da peroveta aiwai i ririwei ega awarimi ina tupua. Aubaina i riwa;

⁴¹ *Ona rautaniḡana vivijiboḡami,
kaua ḡaeḡaena ana kauei da Ona baei ma
ona iraḡel!*

*Aubaina ami au lawana kaua ḡaeḡaena ana kauei
da taumi ona vitumaḡana-avei.*

⁴² Paul ma Barnabas i opuopu ma rava i nei ma i vibaḡa-guratei da ita nememei au Sabate ḡelauna da Tauvilawana ana kaua ita babanana-kauei. ⁴³ Boru i kwa da rava i vilamonei, mai Jew borui ma ḡelau marina ina bori i vaia da i vimai-jew, tau Paul ma Barnabas i votaḡoi, ma i riwana-guratei da Iesu ana aguei ina mae jijina.

⁴⁴ Au Sabate ḡelauna taon ravai anapui i ḡeta da Iesu riwana aiaina ita nonori. ⁴⁵ Maranai mai Jew wei patarana i 'nanai ma orai unura i oai ma Paul i vikaua-morumoruei ma i vitepaubaubai.

⁴⁶ Ma Paul ma Barnabas ana tepatorai i babani, "God riwana ajimei awarimi au naona, wate taumi wei riwana o geduaiei. Wei e viviatataiana da taumi lawana mamae-nonoana ega ota ḡoeḡoei. Lamna aubaina ana voteremi ma God riwana ana jimei Jentail awarii. ⁴⁷ BADA wenanare riwa bagibaginei i riwelai,

*Tau a vinemi da lalalaina Jentail awarii,
da rava anapui au dobu ona riwei
menanare ai gō'apoapoe a nota-tawanei
ma a vilawani. (Isaiah 49:6)*

⁴⁸ Maranai Jentail wei riwana i nonori, tau i vinuai ai kua ma BADA Riwana Aiaina i voepapai, ma tau da God i vinei lawana mamae-nonoana ita vaia, i vitumaḡana.

⁴⁹ Ma BADA Riwana Aiaina i vituai nai au paratana. ⁵⁰ Wate mai Jew Jentail waivinei manemanei ma mai Jew ḡelau i egari da Paul ma Barnabas ai ḡavia i vomairi ma dobunei i viaḡaḡana-opunei. ⁵¹ ☆ Anina ma tau aei pokauna i rauabuabui da ita viatataiei da BADA eḡa ita vinuai ai awarii ma i nae au Ikoniam taon. ⁵² Wate Arua Vivivireina kerisiana voui au Antiok orai i oai ma i vinuai ai kua.

14

Paul ma Barnabas i jima au Ikoniam.

¹ Kauana tagogina i tupua au Ikoniam. Paul ma Barnabas i nae mai Jew ai au boru numana ma menanare i babaninei da mai Jew ma Jentail maḡamaḡau i vitumaḡana. ² Wate mai Jew ḡelau eḡa vivitumaḡanai Jentail i kelari ma ai nota i barai da Paul ma Barnabas i geduaiei. ³ Avena ma Paul ma Barnabas kampa i mae guratana ma ana tepatorai BADA ana aguei i jimajima. Ma kua babaii ma vivirewapanai maḡamaḡau i kau ei. Wei i vimataira da ai jima lamna riwa kua.

⁴ Taon i kai ḡelau mai Jew aubaii i mairi ma ḡelau Aposol aubaii i mairi. ⁵ Ma mai Jew ma Jentail ḡelau i vioga da Paul ma Barnabas ḡaime i ita virauraei. ⁶ Wate tau riwana i vaia ma dobuna

☆ **13:51:** Mrk 6:11

i ruba-tawanei ma i nae au taon gaegeaei Listara ma Derbi au Laikonia provins ma taon au ririvai. ⁷Ma weka Riwana Aiaina i jimana-naiei.

Rava i notai da Paul ma Barnabas god

⁸ Au Listara oroto aena gōkokokarana, alona manawanei gwaḡagwaḡana i vinatunei ma eḡa ita babara dadana. ⁹ Kampa i kiala ma Paul i bababani i rarautaniḡanei. Paul matana i tawanei ma i 'nanai da tauna i vitumaḡana da ita lawana ¹⁰ ma i garara awarina, “Aemei ma mairi!” Ma orotona aenei i mairi ma babara i vikarei. ¹¹ Maranai patara i 'nanai Paul aiwai i kauēi tau i ava ai ponei i babani vivira, “god ruaḡa i ḡairai awarita me *rava.” ¹² Tau i riwa da Barnabas lamna mai Greek ai god Zeus[†] ma Paul i vitauvibabani aubaina i riwa da tauna Hermes. ¹³ Zeus ana pulo gabuna, taon au giana, Zeus ana piri si patara maiteni bull ma berana ulaulai i neiai taon au metaetana da Apasol ita puloi.

¹⁴ Wate maranai Paul ma Barnabas wei riwana i nonori, tau i ai gara i sikai ma i ruba-opu patara awarii ma i garara, ¹⁵ ☆ “Aiwai aubaina wei kauana o kaukauei? Tauai rava ota me taumi nanare! Tauai Riwa Aiaina a neneiai da nai kauai kwakwavi ona voterei ma ona nae BADA lawalawaina ona viborumei. Tauna mara ma dobu ma boga

* **14:11:** Paul ma Barnabas Greek ponanei i bababani † **14:12:** Zeus lamna mai Greek ai god gaegeaena. Rava ai vitumaḡana da godna e vivilawani. Hermes lamna Zeus natuna ma tauna lana Tau-vinolanolana. Zeus ma god ḡelau i aubaii. Rava i notai da Hermes lana e kauwei da rava e babana-kauwa ma ai babara e aiaii. Wate nanarena e notanotai da tauna kauwa aiaina e vivitupui ma e kauwei da rava e vivinatuna kauwa. ☆ **14:15:** Exo 20:11

ma aiwai anatapuna au orai i kauēi. ¹⁶ Wariāga tauna rava i voterei da ai gōanei i mae. ¹⁷ Wate marana patapatai e viviatataiemi da tauna e mamae ma ana nuavaina e verevereta, garewa marei ma maura ma lam e vereveremi ma au orami nuaiai e oaoai.” ¹⁸ Apasol i bababani ma i kauana-guratei da ravai ita viḡaei da tauī avena ita puloi.

Mai Listara Paul ḡaimei i virauraei.

¹⁹ Mai Jew ḡelauī Antiok ei ma Ikoniamēi i nei ma patarana i egari da Paul ḡaimei i virauraei ma taonei i taina-opunei, i notai da tauna irāḡe. ²⁰ Wate maranai vivitumaḡanai i ḡeta da i mae-kwaviviroi, tauna i vomairi ma i naeme au taon.

Aupom ḡelauna tauna ma Barnabas i nae au Derbi.

²¹ Paul ma Barnabas Riwana Aiaina i jimeī au Derbi ma ekalesia vouī maḡamaḡauī i rui. Ma i nae me au Listara, Ikoniam ma Antiok. ²² Metauna au dobuna i jimajima kampa tauvitumaḡana i ririwana-guratei ma i vovai-virewapani da ina mairi-jijina ai au tumāḡana i pa, “Piripiri maḡamaḡauī au orana ona rui wate au murina God ana au vibadana ona rui.” ²³ Paul ma Barnabas ekalesia nununai ai babada i vinei ma i raupari ma i uji BADA awarina, da ai ekalesia ma ai babada ina paini. ²⁴ Anina ma au Pisidia provins i verautua da i nae me au Pamphilia provins. ²⁵ Au Perga BADA riwana i jimeī ma i ḡaira au Atalia. ²⁶ Ma kampa i amkuka ma i nae me au Antiok au Syria provins, weka ai nola i vikarei, maranai ekalesia kampa God i vibaḡai da tauī ita viaiaini ai au nola ma i paritawanei ma marina ai nola e vivikwai.

²⁷ Ma kampa i ġeta ma ekalesia i vitagogiei, ma aiwai anapuna God ana aguei i kaukauei rava i vieġei, ma menanare Iesu metaeta i votawanei da Jentail maiteni Tauna i vitumaġanei. ²⁸ Ma kampa tauvitumaġana maiteni i mae guratana.

15

Boru au Jerusalem

¹ Wate nelara ġelau Judeaei i ġairai au Antioch ma ekalesia i viararamani i pa, “Mepa da eġa ini-bori ona vaia Moses ana tarawatu e ririwei nanare, God taumi eġa ina vilawanimi.” ² Ma karuwaġawaġa ġaeġaena i bauni Paul ma Barnabas maiteni. Ma tau Paul, Barnabas ma rava ġelau i vinei da i ġae au Jerusalem da Apasol ma babada ita inantai wei babanina aubaina. ³ Ma i paritawanei au Jerusalem, Ma ai au vaġai ekalesia au Phonisia ma Samaria provins i parivere menanare Jentail i mae-tavirei God awarina. Ma tau i vinuaiaii kua maraina wei i nonori. ⁴ Maranai i ġeta au Jerusalem, ekalesia ma Apasol i nei da i nebelei. Tau i parivere menanare kua anapui God ana aguei i tupua. ⁵ Wate ekalesia ġelau mai Pharisi, i vomairi ma i babani guratana i pa, “Jentail anina da inibori ina vaia ma ona egari da Moses ana tarawatu ina voteletelei.”

⁶ Apasol ma babada i viboru da wei babanina i okei. ⁷ ✧ Ma i vitarapiri guratana ma Peter i vomairi ma tau i riwei i pa, “Au rava! O aramanei da au orata God i vineu da Riwana Aiaina ana jimei Jentail awarii da tau ina nonori ma

✧ 15:7: Act 10:1-43

ina vitumaḡana. ⁸ ✨ God rava anapui ai nota e araramanei, ma Jentail Aruana Vivivireina i verei me tauta nanare. Wei matairana i viatataieta da God i vianina. ⁹ Tauna Jentail ma tauta e vaivainita da tagogina, ma ata vitumaḡanei orata i viaiaiani. ¹⁰ Marina aiwai aubaina God o viviamlo-ḡaiḡaini? Tauta amamata maiteni eḡa tata virewapana da tarawatu tata vojijina-kauei. Wate marina wei vitana Jentail ta verevere-damanei. ¹¹ Eḡateni! Tauta anapui ta vivitumaḡana da BADA Iesu ana aguei tana lawana, ma nanare Jentail maiteni.”

¹² Rava anapui i genuana ma Barnabas ma Paul i rautaniḡanei, tau i bababani menanare ana au vaḡai God ana aguei kaua aniba ma vivirewapana i kauei Jentail awarii.

¹³ Maranai i babani vorovei, James* babani i vikarei, “Au rava ona rautaniḡaneu.

¹⁴ —Peter † au naona i pariveremi menanare God Jentail i raugenari ma ḡelau i vinei da tauna ḡarinei. ¹⁵ Ma Peroveta nununai wei kauai i bababaniei marina nanare e tuputupua:

¹⁶ *Wei au murina ana nememei,
ma David ana numa gara ana voa-melei.*

*Ana vituramairini
ma ana kauei da ina virewapana me.‡*

¹⁷ *Da rava mamae-terenai*

BADA ina baiei,

*Wate Jentail a rauḡorei da ḡariuei, BADAi riwa.
(Amos 9:11-12)*

✨ **15:8:** Act 10:44; 2:4 * **15:13:** Iesu ana tevera † **15:14:** Peter wavana ḡelauna Simon. ‡ **15:16:** Maranai God David ana numagara e bababaniei lamna David ana vibadana vouna e ririwei ma eḡa ana epaepaia.

18 *Wariaġa da marina wei ta aramanei.*

19-21 —✧ Lamna au baina eġa tana kauēi da ina piri-piri Jentail aubaii, tauī e mamae-tavirei God awarina. Wate pepa tana girumi ma tana egari da lam e pulopuloei god morumorui awarii eġa ina ani, eġa ina viawawana labalababa, ġamoġamo uai e kikiki eġa ina ani ma sia ana tarana eġa ina ani. Aubaina wariaġa da marina Moses ana tarawatu e raugugulei boru au numai Sabatena patapatana.”

Pepa i girumi Jentail awarii

22 Ma Aposol, babada ma ekalesia anatapui rava ġelau i vinei ma i paritawanei au Antiok au Syria provins Paul ma Barnabas maiteni. Tauī ai babada ruaġa i vinei wavai Judas wavana ġelauna Barsabas ma Sailas. 23 Ma wei pepana au urai i terei,

Aposol, ekalesia babadai, varevareimi.

Jentail ekalesia au Antiok, Syria provins ma Silisia provins. Varevareiai, egualau!

24 Tauai riwana a vaia da rava ġelau ai au boru i ġairai ma ai viararamani i vinuabolaimi ma i visina-viraviraimi, wate tauai nai ravai eġa ata paritawanei. 25 Lamna aubaina tauai a viboru ma a vianina da taupariverena ata paritawaneiai, ata rava Paul ma Barnabas maiteni, 26 tauī i verena-melei ma ai lawana eġa ita vinuabolei BADA Iesu Keriso wavana aubaina. 27 Judas ma Sailas a pariparitawanei da tauī gamoieī ina riwemi aiwai tauai a girumi.

✧ 15:19-21: Lev 18:6-23; Lev 17:10-16

28 Arua Vivivireina ma tauai ai ġoana da eġa vita ġaeġaena ana veremi, anina wei tarawatuna ava.

29 Lam god morumorui i puloi eġa ona ani, Eġa tara ona umai, Eġa ġamoġamo uana kikikina vioana ana tarana ona ani.

Eġa ona viawawana labalababa,§ Mepa da wei tarawatui ona vojijina-kauei, taumi kua aiaina o kaukauei. Eġalau kua.*

30 Ma nelarai i paritawanei da i ġaira au Antiok, ma ekalesia i rieiai da pepa i verei. 31 Ma tau i 'avi ma i vinuai ai kua pariverena aiaina aubaina.

32 Judas ma Sailas tau i God ana peroveta ma i babani guratana awarii ma wei tau i vinuai ai ma ai tumaġana i vovai-virewapani. 33 Ma kampa i mae mara aburuna ma ekalesia ana nuubai i paritawana-melei au Jerusalem. 34 † 35 Wate Paul ma Barnabas au Antiok i mae, ma tau i maiteni BADA Riwana Aiaina i viararamani ma i raugugulei.

Paul ma Barnabas i vilamonei

36 Ma muriai Paul, Barnabas i riwei, “Tana nae dobu au anatapuna mepa BADA Riwana Aiaina ta raugugulei ma ekalesia tana raugenari, ma tana

§ 15:29: Viawawana labalababa ġelau wei: Rava ġelau awawai maiteni e viawawana. (Exo 20:14, Deu 5:18) Mane aubaina e viawawana (Lev 19:19, 1 Cor 6:15) Am femili ravai o viviawawanei (Lev 18:22, Rom 1:26-27) Ġamoġamo e viviawawanei (Lev 18:23) Rava eġa uta ravaġi ma e viviawawanei (Eph 5:3) Rava u egari da u viawawanei. (Gen 34:7, Deu 22:25-28) * 15:29: Kua ġaeġaena lamna eġa ini bori ma Iesu ana aguei, u korosi i take aubaita. † 15:34: Buka waduwaduboi au orai vs 34 eġa ita mamae “Wate Sailas i ġoei da kampa ita mae.”

inanai tau i anina bo eḡa.” ³⁷ Barnabas i ḡoei da John-Mark ita taravaini. ³⁸ ✧ Wate Paul wei notana eḡa ita ḡoei aubaina au naona John tau i au Pamphilia i ruba-tawanei ma eḡa ita mae da maiteni ita nola. ³⁹ Ai viparipariniḡai i apoapoe guratana da tau i vilamonei. Barnabas, Mark i taravaini ma kukei i damana au au Saipras. ⁴⁰ Paul, Sailas i vinei. Ma ekalesia, BADA i vibaḡai da ana aguei tau i ai au nola ina paini. ⁴¹ Tau Syria da Silisia i naeni ma ekalesia i raugenari ma i vinua-terenei.

16

Timothy Paul ma Barnabas maiteni i nae

¹ Paul i nae au Derbi da au Listara, kampa tauvotaḡotaḡo i mae wavana Timothy. Tauna alona Jew ei ma kerisiana, Wate amana Jentail. ² Ekalesia au Listara ma Ikoniam Timothy i voepaepana-kauei. ³ Paul i ḡoei da tauna ita taravaini ana au vaḡai, lamna aubaina ini bori i verei aubaina mai Jew kampa i aramanei da tauna amana Jentail. ⁴ Maranai taon nununai i nenaeni, ma ekalesia kampa i paripari-verei Apasol ma babada au Jerusalem ai nota, ma i riwei da tarawatu i ririwei ina votaḡotaḡoi. ⁵ Ma ekalesia ai vitumaḡana i vovai-virewapanai ma tauvitumaḡana voui i ruirui marana patapatai.

Paul ana rauboni

⁶ Arua Vivivireina Paul ana rava maiteni i viḡaei da eḡa BADA riwana ita jime i au Eisia provins, ma

✧ 15:38: Act 13:13

Pirijia ma Galatia paratana i naeni. ⁷ Maranai i nei Maisia ana au provins ma i ġoei da ita damana au Bithinia provins. Wate Iesu Aruana eġa ita vianinei. ⁸ Ma Maisia i verautuini da i nae au Troas. ⁹ Waguvaraina Paul ana au inana i 'nanai oroto Macedonie i maimairi ma i vivibaġai i pa, "Ma damanai au Masedonia da ma voaguiai!" ¹⁰ Paul ana rauboni au murina tauai a vioga da laġilaġina ana vomairi Masedonia provins aubaina. Tauai a vitumaġana da God i ġorelai da Riwana Aiaina kampa ana jimei.

Paul i nae au Philipai.

¹¹ Au Troas tauai amkuka, a viaruana damana au Samotreis bonabonana a ġeta ma au pom ġela a kuka-nae au Neapolis. ¹² Ma kampa da a babara nae au Philipai taon au Masedonia provins, weka mai Rome ai sorodia ai bareki ġaeġaena i mae, kampa a veraumae. ¹³ Ma au Sabate taon a opu-tawanei ma a nae au waira, a notanotai da kampa boru gabuna wate eġa. A kiala ma waivine ruaġa ota kampa i rauriei awari a babani. ¹⁴ Taurautaniġana tagogi lamna Jentail wavinena wavana Lidia ma ana dobu Thaiataira. Tauna gara lebalebarina maiana ġaeġaena taugimareina ma God i vitumaġanei, ma God orana i votawanei da aiwai Paul i bababaniei i rautaniġanana kauai. ¹⁵ Maranai wavine ana numa ravai i babataito ma i rauġorelai i pa, "Ona nei au numa mepa da o notanotai da tau kerisiana ririwa kauana." Ma i egariai da ana au numa a mae.

Paul ma Sailas au panipani numana au Philipai

16 Mara tagogi a nenaē boru au gabuna ma taunola guguini a nebelei, Tauna au orana arua apoapoena i mae ma lamnei aiwai amapo da ina tupua i vivieḡai. Ma mane ḡaeḡaena i kaukauei ana taniwaga aubaina. 17 Tauna Paul ma tauai i votaḡotaḡoiai ma i garagarara “Wei nelarai God ḡeḡetelarana ana taunola! E vivinolanola menanare God e vivilawananei.” 18 Wei kauana i kauei au pom biaḡa da Paul i viamlo-ḡaiḡaini da i mae-tavirei ma arua apoapoena i riwei, “Iesu Keriso wavanei a egaegarim da wavine ma opu-tawanei!” Maratagogi arua apoapoena wavine i opu-tawanei.

19 Maranai taunola guguini ana taniwaga i aramanei da ai mane etanaina i vine-boai, tau Paul ma Sailas i vojijini ma i taina naiei au deba Gabemani awarii. 20 Tau i nei ai taurauetara awarina ma i riwa, “Wei nelarai mai Jew wei dobuna ravai e vivinuaragaḡaraḡai. 21 Tauī ata rava kaua ḡelau i viviararamani ma wei ata giu e teretereḡairei.”

22 Ma patara i rui Paul ma Sailas vunuai aubaina. Ma gabemani Paul ma Sailas, ai gara i sikai ma wipiei i kwapui. 23 I vunu-kauei ma i tawana-ruiei au panipani numana. Ma numana badana i egari da ita paina-kauei da eḡa ita ruba. 24 Anina ma Panipani badana tau i tawana-ruiei, panipani numana au orana ma aei, ai vivitaini au orana i raḡita-jijini.

25 Nubautuvai Paul ma Sailas i raraupari ma i welawela God awarina ma panipani ḡelau i rarautaniḡana. 26 Nanare ma lolo ḡaeḡaeotana dobuna i gui. Ma maratagogi pani numana metaetana i wana-tawatawanei ma panipani

anatapui ai sein i dabarara. ²⁷ Pani numana badana i vomairi ma ita inana da metaeta wanatawanana ma i notai da panipani i ruba ma lamna aubaina ana sod i lavui da ita viragena-melei. ²⁸ Wate Paul i garara, “Ega ma vunu-melem! Tauai anatapui weka!”

²⁹ Pani numana badana ana taunola i gōrei da lalalaina ita nei ai ma i ruba-rui ma ana sisina i mae-peu Paul ma Sailas au naoi. ³⁰ Ma i opunei au doa ma i paridadanei, “Babada aiwai ana kau ei da ana lawana?”

³¹ Tau i paribelei, “BADA Iesu Keriso ma vitumaḡanei ma ma lawana, am numa ravai maiteni.” ³² Ma God riwana i raugugulei tauna ma ana numa ravai awari. ³³ Nai maranaina avena da waguvarai, pani numana badana Paul ma Sailas i naiei ma keroi i oḡai, Ma maratagogi tauna, ana numa ravai maiteni i babataito. ³⁴ Paul ma Sailas i ḡaiei ana au numa da i viambagibagi. Tauna ana numa ravai maiteni i vinuai ai kua da marina God i vitumaḡanei.

³⁵ Ma marana i tom ma tauetara ana taunola* i paritawanei pani numana badana awarina ma i egari i pa, “Nelara ma voterei da ina nae.”

³⁶ Pani numana badana Paul i riwei, “Taurauetara i egariu da ana voteremi da ona nae. Marina ana nuaubami ona nae.”

³⁷ Wate Paul, taurauetara i riwei, “Tauai ega ita rautarelai ma i vunu-kaulai patara au matai. Ma avena da tauai mai †Rome, wate marina i gōei

* **16:35:** vs. 20 ma inana. † **16:37:** Mai Rome ai tarawatu lamna, “Ega rava Romei ma kwapu labalababai bo ma pani da au naona ma rautarei.” Rome Israel i vibadei Iesu ana au mara.

da govagovaḡanei ina paritawanelai bo? Eḡateni kauh! Ona voterei da taurauetara ina nei weka da ina naielai.”

³⁸ Tauī wei babanina i naiana-melei da babada i riwei ma tauī i rovo kaukaua maranai riwana i nonori da Paul ma Sailas lamna mai Rome. ³⁹ Ma i nei au pani numana ma i riwa, “Tauai a kauana-boai, ai ḡo’apoapoe ona nota-tawanei.” Ma i tere-opunei ma i vibaḡa-guratei da dobuna ita oputawanei. ⁴⁰ Ma Paul ma Sailas pani numana i opu-tawanei ma i nae Lidia ana au numa ma kampa kerisiana maiteni i viboruboru ma i vovai-virewapani. Anina ma tauī dobuna i netawanei.

17

Au Thesalonika

¹ Paul ma Sailas Amphipolis taon ma Apolonia taon i voterei da i nae au Thesalonika taon. Weka mai Jew ai boru numana i mamae.

² Ma i rui au boru numana au Sabate me mara patapatai i kaukauei nanare, kampa Sabate tonuḡa rava awari God riwana i viararamani. ³ Ma God riwanei i viararamana da Keriso ina vinuapoapoe ma iragelei ina vomairi me, “Wei ravana a bababaniei awarimi, tauna Iesu Keriso.” ⁴ Mai Jew ḡelauī orai i taini ma tauī i votaḡotaḡoi. Ma nanare Jentail nelara maḡamaḡagauī God taurauduneleina ma waivine wavai naenaēi maḡamaḡauī.

⁵ Wate mai Jew i unura ma rava ora-potapotai maḡamaḡauī au etanai itami ma au taon vikaruwaḡawaḡa i vikarei. Ma oroto wavana Jason ana numa i ruini Paul ma Sailas i baibaieī da ita opunei patara awari. ⁶ Wate maranai eḡa

ita nelaḡai taur Jason ma kerisiana ḡelaur i tainanaiei taon babadai awari, ma i garara, “Wei ravai dobu au anata-puna apoapoe maḡamaḡaur i kauai, marina i ḡetai ata au dobu.” ⁷ Ma Jason, Paul ma Sailas i taravaini ana au numa. Taur Caesar ana tarawatu e viviaigai ma e ririwa da gulau ḡelauna e mamae wavana Iesu.

⁸ Maranai patara ma taon babadai wei babanina i nonori taur amloi i ḡaiḡai kaua, ⁹ ma Jason i egari da mane ḡaeḡaena i vimaiei da eḡa mae boaboa ḡelauna ina vitupui. Ma taur Jason i voterei da i nae.

Au Berea

¹⁰ Ma waguvarai tauvitumaḡana Paul ma Sailas i paritawanei au Berea. Maranai kampa i ḡeta, ma i rui au boru numana. ¹¹ Mai Berea i viaiaii, eḡa me mai Thesalonika. Taur i rautaniḡana ma i votelatela ma marana patapatana God ana buka i 'aiavi da ita aramanei da Paul aiwai i bababaniei lamna riwa kaua. ¹² Ma lamnei mai Jew maḡamaḡaur i vitumaḡana, ma nanare mai Greek waivinei wavai naenaiei ma nelara.

¹³ Maranai mai Jew au Thesalonika paratana i nonori da Paul God riwana i raraugugulei au Berea, taur maiteni i nae kampa, ma rava i rauegari da ḡavia ita vikarei. ¹⁴ Maratagogi kerisiana Paul i paritawanei au gera wate Sailas ma Timothy au Berea provins i mae. ¹⁵ Ma nelara Paul i tauvigwanigwaniei da au Athens, ma Paul nelarai i riwei ma i paritawanei au Berea da Sailas ma Timothy ita riwei da laḡilaḡina ita nei awarina.

Paul au Athens i raugugula

16 Ma Paul au Athens ana rava i paipaini, ma i 'nanai da kampa kokoitau i maḡa kaua ma i vinuabola kaua. 17 Mai Jew ma mai Greek God tauviborumaina awari i jima guratana au pari numana ma nanare au deba, aiai da i ḡeta ma i rautaniḡana. 18 Ma rava ḡelau i nuaulaulai i ḡetai ma maiteni i vitarapiri, tau i e ḡoreḡorei mai Epicure ma mai Stoic*, tau i lawana ai kaua tauviiaramanai. Ma ai rava ḡelau i paridadana, “Wei ravana aiwai e voḡavoḡanei?” Ḡelau i riwa, “Mepa da tauna dobu ḡelau ai god e bababaniei.” Tau i wenanare i babani aubaina Paul Iesu Riwana Aiaina ma ana iraḡe ma ana vomairi me, i raugugulei.

19 Ma i taravaini ma i naiei ai au boru e ḡoreḡorei Areopagus ma i riwei, “Ma nei ma a ḡoei da am viararamanana vouna e bababaniei, ata aramanei. 20 Kaua ḡelau e babaniei tauai a vivinuanainei, ma a ḡoei da ana aramanei anona aiwai?” 21 (Taumana ma mai Athens marana patapatai ai nola eḡa aiwai, da kaua voui ina virarautuei ma ina nononori.)

22 Ma Paul babadai au naoi i mairi ma i riwa:

* **17:18:** Mai Epicure rava wavana Epicurus ana viararamana i votaḡotaḡoi. I viararamana da lawana ana ano lamna nuaiiai. Da tau i aiwai da tupuai ma matai ana rauoḡara, e vivinuaiiei. Ma aiwai da e virovorovi bo inivara e verevereia. Tau i wei lamna e ḡedugeḡuaiei. Tau i e ririwa da God rava eḡa ita vinuavainei Stoic rava wavana Zeno ana viararamana e votaḡotaḡoi. I viararamana da rava ma ai maiteni au ririvata ta mamae (nature) ita vivirei, Tau i ai ḡoana ma ai erawa ita teretawanei ma ita vinuanotanota kaua ma avena rava ḡelau ai agu ita raunenelei. Tau i e ririwa, “Nuaiiai lamna kaua e vovoterei da mena ina tupua nei nanare ina tupua.”

Dogadogara mai Athens! A inana da taumi vipatupatutumi ami god awarii, ²³ A bababara ma ami pulo aniapunana a inainanai, ma tagogi a inanai au tepana i giruma, “Wei God eġa ata araramaneia aubaina.” Wei Godna o viviborumei wate eġa ota aramanei. Tau ana riwemi nai Godna aiai. ²⁴ ✨ Tauna God mara ma dobu ma aiwai anatapuna au orana i kauiei. Ma tauna mara ma dobu badana, ma numa rava uranei e voavoai au orana eġa ita mamae. ²⁵ Ma eġa rava ai agu ita paipaini, tauna agu eġa ita ġoeġoei. Aubaina tauna rava lawana ma lavutu ma anatapuna e vereverei. ²⁶ Au karena rava tagogi i kauiei ma nai ravanei dam patarai i vitupua ma dobu i maeni. Tauna ainelana rava ai mara i terei da ina mae ma ina irage ma animae paratana i aiterei. ²⁷ God wenanare i kauiei da rava tauna ina baiei da mepa ina nelaġai. Wate tauna au ġereġereta, eġa au uama. ²⁸ Taugiruma ġelauna Greekei i riwai pa, “Taunei ta mamae ma ta bababara ma anatapuna ta kaukauiei.”† Ma wate ami taugiruma ġelauna i girumi i pa, “Tauai nanare tauna natunatuna.”‡

²⁹ Ma tauta God natunatuna, eġa tana notai da God lamna me kokoitau, goldei bo silvei i kauiei. Rava uraiei ma ana nuaulaulauei i kauiei. ³⁰ Wariaga rava God eġa ita aramanei wate God tau i 'nana-tawanei, wate marina anataputa egaegarita da tana rupena ma tana mae-tavireta awarina. ³¹ Aubaina mara i vinei maranai rava

✨ **17:24:** 1Ki 8:27; Act 7:48 † **17:28:** Epimenides Ciritei au 6 century BC. ‡ **17:28:** Aratus Silisiei 3 century BC.

anatapui aiainei ma jijimaninei ina kovoḡi. Rava i vinei da taunei ina kovoḡa. God wei ravana iragelei i vovaimairini lamna ina vimataira rava awari da ravana anina tauna.

³² Maranai Paul iragelei vomairina i babaniei, rava i nonori ma ḡelau tauna i vinamei wate ḡelau i riwa, “Tauai a ḡoei da muriai wei babanina ma babaniana-melei.” ³³ Ma Paul ai boru i opu-tawanei ma boru i gudu. ³⁴ Wate ḡelau i vitumaḡana ma Paul i votaḡotaḡoi. Tagogi lamna Dionisius, Areopagus boruna au orana, ma wavine wavana Damaris, ma rava ḡelau.

18

Paul i nae au Corinth da rava awari Iesu ita jimei

¹ Paul Athens i netawanei ma i nae au Corinth.
² Kampa Akwila tauna Jew au Pontus i tupua, marinaota au Italy * da i nei awana Prisila maiteni. Aubaina Rome ai gulau Claudius mai Jew anatapui i viaḡagei da Rome i opu-tawanei. Paul i nae da tau i ita inana. ³ Paul tau i maiteni i mae, tau i tauampopo, (ḡamoḡamo opina ma gara i popopoi numa aubaina ma i gimagimarei) me Paul ai nola tagogina. ⁴ Sabate patapatana au pari numana tauna mai Jew ma Jentail awari i jima guratana da orai ita sinavirai.

⁵ Maranai Sailas ma Timothy au Masedonia da i ḡetai, Marina Paul BADA riwana ava i raugugulei mai Jew awarii da Iesu tauna anina God ana

* **18:2:** Rome taon lamna taon ḡaeḡaena au Italy ma ai kapital AD. 49 au orana kampa viḡaiḡaiawa ḡaeḡaena da wavalatona Claudius mai Jew i riwei da dobuna i netawanei.

Vinevine Keriso. ⁶ Wate mai Jew Paul i viġaviei ma riwa apoapoenei i ririwei. Ma tauna ana gara i rauabuabui ma awari i riwa, “Mepa da o kwako, lamna ona viwavu-melemi, eġa tau ona viwavui! Marina da e nena, ana nae Jentail awari.”

⁷ Ma tau i voterei ma i nae Jentail wavana Titus Justus ana au numa imae, tauna God tauviborumeina ma ana numa pari numana au ġereġerena. ⁸ Crispus, pari numana ai bada, BADA i vitumaġanei ana numa ravai maiteni, ma mai Corinth maġamaġau Paul i rautaniġanei, i vitumaġana ma i babataito.

⁹ Waguvara tagogi BADA Paul ana au inana i babani i pa, “Eġa ma rovo, ma babani ma eġa ma genuana.” ¹⁰ Aubaina Tau tam maiteni. Ma rava eġa ina rau-iviapoapoelem aubaina au tau-votaġotaġo i maġa wei au dobuna. ¹¹ Ma Paul kampa i mae madeġa tagogi ma nawaravi six, ma God riwana i jimei.

¹² Wate maranai Galio i vi-Gavena au Akaia provins, mai Jew kampa i vitagogiei ma Paul i vojijini ma i naei Gavena awarina da ita rauetarei. ¹³ Ma tau i viwavui 'pa, “Wei orotona ana moruei rava orai e taitaini da God e viviborumei ma ata tarawatu e viviaigai.”†

¹⁴ Ma Paul gamona i laġi da ita babani ma Galio i babani mai Jew awari i pa, “Mepa da taumi

† **18:13:** Mai Jew e ririwa da Paul eġa tau ai vitumaġana oina ita viararamani ma wei Rome ai tarawatu i vianinei, wate e ririwa da Paul rava taparoro vouna e viararamani ma wei Rome ana tarawatu e viviaigai, lamna aubaina tau i ġoei da Rome ai bada Paul ina kovoġi. Ma inana Act 16:20-21 ma 17:7.

wei ravana o viviwavui da kaua g̃aeḡaei bo kaua apoapoe aubaina, lamna tau au nola da ata rautaniḡanemi. ¹⁵ Wate wei taumi ami babani ami wava ma ami tarawatu, ana voterei au urami. Tau eḡa wei kauai ana rauetarei.” ¹⁶ Ma etara numanei i viaḡaḡana-opunei. ¹⁷ Tau i anapui pari numana ai bada Sothenis i vojijini ma i vunui etara numana au naona wate Galio tau i 'nana-tawanei.

Paul i nae me au Antiok au Syria

¹⁸ Paul i mae mara aburuna tauvitumaḡana maiteni au Corinth ma wagei i nae au ḡereḡere au Cenkirei waga ai au animae. Prisila ma Akwila maiteni. Ma kampa Paul ana parivainuaḡana aubaina aparana i ḡari, ma anapui i nae au Syria ¹⁹ Tau i au Ephesus i ḡeta ma Paul, Prisila ma Akwila i voterei. Ma i nae au boru numana Mai Jew awari i jima. ²⁰ Rava i vibaḡai da ita mae mara aburuna wate tauna eḡa ita vianina. ²¹ Wate maranai i opu da ita nae ma tau i riwei, “Ana nememei mepa da God ana ḡoana, ma Ephesus i netawanei ma wagei i damana.” ²² Maranai i ḡeta au Caesarea ma i nae au Jerusalem da kerisiana i raugenari ma i nae au Antiok. ²³ Au Antiok i mae mara aburuna ma Galatia provins ma Pirijia provins i naeni ma kerisiana i vovai-virewapani.

Apolos mai Ephesus awari i raugugula

²⁴ Wei marana Apolos tauna Jew, au Alexandria da Egypt da i nei au Ephesus. Tauna BADA riwana

ma ana giruma i aramana-kauei ma rava bababana. ²⁵ Rava ġelau, Apolos BADA ana etanai babana, i viararamani, ma ana tepatorana i jima ma Iesu ana kua ma ana lawana i viararamana-kauei. Wate tauna John Taubabaito ana babaito babani ava i aramanei. ²⁶ Ma i vikarei da ana tepatorana i raugugula au boru-numana. Wate maranai Prisila ma Akwila tauna ana babani i nonori. Ma i ġorei da maiteni i nae ai au numa ma BADA ana etanai ana babani i viaramana-kauei.

²⁷ Maranai Apolos i nena au Akaia, kerisiana Apolos i vovai-virewapani. Ma kerisiana au Akaia ai pepa i giruma da ita parivere i da tauna ita nebelei. Maranai au Akaia i ġeta ma tau i God ana aguei i vivitumaġana, agu ġaeġaena i verei. ²⁸ Tauna ana babanie i au deba mai Jew i vovaiubai. Ma God riwana i vaia ma lamnei rava i viararamani da Iesu anina Keriso.

19

Paul au Ephesus

¹ Apolos au Corinth taon Akaia provins i mae, ma Paul ola i taġoni da au Ephesus i ġeta. Kerisiana ġelau kampa ² ma i paridadanei i pa, “Arua vivivireina o vaia bo eġa maranai o babaito?”

Tau i paribelei i pa, “Eġa, Tauai eġa ata aramanei da Arua vivivireina e mamae.”

³ Ma Paul i paridadana, “Aiwai babaitona o vaia?”

Tau i paribelana, “John ana babaito a vaia.”

⁴ ✧ Paul i riwa, “John ana babaito lamna mataira da tau ai ġo’apoapoelei i mae-tavirei;

✧ **19:4:** Mrk 1:4, 7-8

ma mai Israel i riwei da Tauna au muriu e nenei ona vitumaḡanei lamna Iesu.” ⁵ Maranai wei i nonori ma i aramanei tau i babataito BADA Iesu wavanei. ⁶ Ma Paul urana au kolai i terei ma Arua vivivireina au orai i rui. Ma i vikarei da pona tapunei i bababani ma God riwana i raugugulei. ⁷ Tau nelara iavana twelve.

⁸ Paul i nae au boru-numana ma kampa nawar-avi tonuḡa au orana ana tepatorana mai Jew awarii i bababani. Da rava orai ita sinavirai da BADA ana vigulau ita vitumaḡanei. ⁹ Wate ḡelau kampa orai i bagibagi ma eḡa ita ḡoei da ita vitumaḡana, ma patara au matai Iesu ana etanai i vijiboḡi. Ma Paul tau i voterei ma kerisiana i taravaini ma i nae Tairanus ana au numa, ma kampa i viararamana ma i giugu pompom. ¹⁰ Ma nanare i mae madeḡa ruagā i kwa, da mai Jew ma Jentail ravai maḡamaḡau au Eisia provins maemaei BADA riwana i nonori.

Sceva natunatuna

¹¹ Ma God ana rewapanei Paul kaua ḡaeḡaei ma aniba i kaukauei, ¹² lamna avena wate rava ai agesi da ai nola garai i naiei Paul awarina da i vodadani ma i naei da rava doridoriai i vodadani, ma arua apoapoei i opu-tawanei ma i lawana.

¹³ Mai Jew ḡelaui dobuna i naeni ma arua apoapoei i viviaḡana-opunei ma i raudadana Iesu wavanei da arua apoapoei i viviaḡaḡei. Tau arua apoapoei i riwei i pa, “Iesu wavanei, taunei Paul e raraugugula, Tau a egarim da ma opu.” ¹⁴ Skeva, piri ai bada natunatuna nelarai seven wei kauana i kaukauei. ¹⁵ Wate mara tagogi arua apoapoenā i paribelei, “Iesu a aramanei ma Paul

a aramanei ma taumi aiavoi?” ¹⁶ Ma rava au orana arua apoapoena maemaena i auepai ma tau i vunui da eġa ita vikalokaloei. Ai gara i sika-naei ma ana kovakovai ma tararatai numei i viopuopuana ma i viruberubei.

¹⁷ Mai Jew ma Jentail ravai au Ephesus mae-maei wei riwana i nonori ma rovo orai i ġaeni ma Iesu wavana i vivirana-kauei.

¹⁸ Maġamaġai i vitumaġana ma i nae kerisiana awarii ma ai ġo'apoapoe i rupeni.

¹⁹ Tauvitumaġana voui maġamaġai paraparau-mai,* ai buka i vidamni au deba ma i apui. Maranai bukai ai maia i 'avi da silver 50,000†. ²⁰ Kaua babai me wei, Iesu riwana i vibabarai nai au dobuna ma rava maġamaġai i vitumaġana.

²¹ Wei anatapuna au murina Paul au orana i vinua-notanota da au Masedonia da Akaia ita verautuini da ita damana au Jerusalem ma i riwa, “Ana nae au Jerusalem ma muriai ana nae da Rome ana inanai.” ²² Ma Paul ana tauagu ruaġa Timothy ma Erastus i aiparitawanei au Masedonia provins, ma tauna kampa i mae mara aburuna au Eisia provins.

Viġaiġaiawa au Ephesus

²³ Iesu ana babani ma ana kaua vouna aubaina, ma viġaiġaiawa ġaeġaena i tupua au Ephesus.

²⁴ Silver taunoleina wavana Demetrius, mai Greek ai god wavinena ana numa taparoro kokoitau i rarau-ġaroġaroei da i gimagimarei, ma wei

* **19:19:** Au Deu 18:10-14 God ana rava e viviġaei da eġa ina parauma. † **19:19:** Dracma coin tagogi lamna tau-vobagibagi ana maia au pom tagogi aubaina. Marina lamna million biaġa.

nolana mane g̃aẽgaena e neineiā silver taunoleina nai au dobuna aubaii. ²⁵ Ma tauī anātapui ai rava nolana tagogina e kaukauei maiteni i rauḡoreiai ma i riwa, “Au rava, o aramanei da ata maura wei nolanei ta vaivaia. ²⁶ Ma o inanai ma o nonori menanare wei ravana Paul e kaukauei, Rava ai nota i sinavirai da maḡamaḡauī god Artemis raudunena i voterei au Ephesus ma dobu Eisia parātana anātapuna. Ma e ririwa da ‘rava god i rauḡaroḡaroei, lamna eḡa god.’ ²⁷ Tauta tana inana kaua da wavata ma ata mane ani kauana eḡa ina apoapoe. Ma ata god ḡetelarana Artemis ana numa taparoro ma wavana eḡa ina vijiboḡi, eḡa au Eisia provins ava ma dobu au anātapuna.”

²⁸ Maranai patara wei babanina i nonori tauī i meji kaua ma i vigaragarei, “Artemis mai Ephesus ai god i ḡetelera!” ²⁹ Ma tauī i garagarara rava nai au dobuna i nonori ma tauī maiteni i garara labalababa. Anina ma patara Gaius ma Aristakas i vojijini tauī ruaḡai mai Masedonia Paul ana tauvigwanigwaniana, ma i rubana-naiei nai dobuna ana boru gabuna.‡ ³⁰ Paul i ḡoei da patara au naoi ita rui da ita babani wate kerisiana eḡa ita vianinei. ³¹ Wate nanare Paul ana rava ḡelauī au gabemani tauna i viḡaei da eḡa ina nae au boru.

³² Patara i vinuanaina, i logologoi ma i garagarara labalababa ma eḡa ita aramanei aiwai aubaina weka i nei. ³³ Mai Jew oroto tagogi i dudu-opunei au naoi wavana Alexander ma patara ḡelauī i garara

‡ **19:29:** Dobuna ana boru gabuna lamna numa g̃aẽgaena. Eḡa poewana, ma inanana me nawaravi gebona. Rava maḡamaḡauī 26,000, nanare ina kiala **meeting place**. Rava e nenaē kampa da kalo tapuna ma e raraubiḡa.

awarina da ita babani. Alexander urana i voepai da tau i ita genuana ma tauna ana rava aubai ita babani. ³⁴ Wate maranai i aramanei da tauna Jew. Tau i anatapui pona tagoginei wenanare i garagarara, “Tauta mai Ephesus ata god Artemis i getelera!” da *hour* ruaḡa i kwa.

³⁵ Ma taon badana patara i riwei da i genuana ma i riwa, “Au rava mai Ephesus, rava anatapui au dobu i aramanei da tauta tauvipaipai mai Ephesus ai god ḡeḡetelarana Artemis ana numa taparoro ma ana ḡaima vivireina marei i peuai aubaina. ³⁶ Eḡa aiai wei ina vikaua-moruei. Lamna aubaina orami ina rauei ma eḡa aiwai apoapoena ona kauēi. ³⁷ Wei ravai o neiāi weka wate tau i eḡa au numa taparoro aiwai ita danenei bo ata god ita riwana-boei. ³⁸ Mepa da Demetrius ana rava maiteni e viwivavui tau i ina nae ina rauetara ma ami viwavu ona naei kampa taurauetara awarina. ³⁹ Ma mepa da ami nuabola ḡelau i e mamae lamna taon babadai ai au boru ona babaniei ma ona tere-jijimani. ⁴⁰ Ma amadodo aiwai i tupua, tau a rovo da ina viwavuita mae-boaboa aubaina. Wei vikaruwaḡawaḡana anona eḡa, ma mepa da Rome ina paridadana ma tauta menanare tana paribelananei. ⁴¹ Anina ma boru i gudui ma rava i vilamonei.”

20

Paul i nae au Masedonia ma Greece

¹ Vikaruwaḡawaḡa au Ephesus taon i kwa ma au murina Paul kerisiana i raukwatueiai da i vinuaterenei, i viegualauēi ma i netawane i da inaē au Masedonia provins. ² Ma doḡuna ḡaeḡaenana

i naeni ma kua maḡamaḡai kerisiana i vinua-terenei. Anina ma au Akaia* i ḡeta. ³ Kampa nawaravi tonuḡa i mae. Tauna i vokaukua da ita nae au Syria ma wate i nelaḡai da mai Jew ḡelau virāḡenana i viviogatarei lamna aubaina da i nae me au Masedonia. ⁴ Nelara ḡelau i votaḡotaḡo tau lamna Piras natuna Sopater ana dobu Berea; Aristakas ma Sekundus, mai Thesalonika, ma Gaius tauna ana dobu Derbi; ma Tijikus ma Trophimus ai dobu Eisia provins; ma Timothy. ⁵ Tau wagei i ainae au Troas ma kampa i painiai. ⁶ Ma palawa bagibagina torelana au murina, wagei Philipai taon au Masedonia provins a netawanei. Ma aupom 5 au murina au Troas a ḡeta ai rava awari, kampa aupom 7 a mae.

Au Troas, Paul Eutikus iraḡelei i vovaimairini

⁷ Wiki au karena - Sunday tauai a vitagogielai voepaepa ma BADA ana amgogona aubaina, ma kampa Paul i jima da nubautuva, aubaina maratonna da ita nae. ⁸ Numa vatavatara au tepana a vitagogielai, ma kampa rampa maḡamaḡai i ararata. ⁹ Orotō laragana wavana Eutikus au windo i kiakiala ma Paul i raraugugula, ma tauna matana i pota kua da i raunuavuru, ma kampa au tepa dewadewana i peu-ḡaira da au doa i rauei. Maranai tau i ḡaira da ita voepai, tauna irairaḡena. ¹⁰ Paul i ḡaira, i matave-tepani ma i rapai ma rava i riwei i pa, “Eḡa ona vinuabola, tauna lawalawaina!” ¹¹ Anina ma Paul i ḡae me au numa ma kerisiana maiteni BADA ana amgogona amna

* **20:2:** Marina e ḡoreḡorei Greek.

i ani ma awari i babani maratom. Ma Paul nai dobuna i netawanei. ¹² Taui laragana lawalawaina i naiei au numa ma rava orai i rauei.

Paul i amkuka au Miletus

¹³ Paul aenei i nae au Assos ma tauai i riwelai da wagei ana nae au Assos da tauna kampa ana vigerui. ¹⁴ Ma au Assos a vigerui ma a nae au Miletus ¹⁵ Maratomna bonabona Kios au ġereġerena a nae. Ma marana i tom au Samos a ġeta, ma maratom ġela au Miletus a ġota. ¹⁶ Paul i ġoei da jijimanina ina nae ma avena ita rui au Ephesus, eġa ita ġoei da au Eisia provins ina mae-guratana. Tauna i vipaparana ma mepa da tagotagogina au Jerusalem ina ġeta muriai da Pentecost torelana.

Paul kerisiana au Ephesus i netawanei

¹⁷ Au Miletus Paul riwa i paritawanei au Ephesus taon kerisiana babadai awari da ita nebelei. ¹⁸ Maranai au Ephesus taon i ġetai ma tau i riwei i pa:

O aramanei au lawana menanare maranai vovounai weka au Eisia provins a ġetai. ¹⁹ Mai Jew i ġoei da ita rau-iviapoapoeleu wate tau a vilamolamona ma ana toutou BADA awarina a vivitaunola. ²⁰ O aramanei da maranai God Riwana Aiaina awarimi a raugugulei, riwa aiaina aniaguimi eġa ata tajjini. Au deba a raraugugula rava maġamaġau au naoi, ma ami au numa a viararamanimi ²¹ Riwa bagibagina mai Jew ma Jentail a verei, A riwei da ita rupena ma ita mae-tavirei God awarina ma Iesu ita vitumaġanei.

²² Ma marina Arua Vivivireina i riweu da ana nae au Jerusalem. Eġa ata aramanei kampa

aiwai awariu ina tupua. ²³ Wate taon nununai awari a nenaē ma Arua Vivivireina e viviegeu da amapo ina paniu ma au deri ina tereu ma ina rau-iviapoapoeleu. ²⁴ Ma mepa da ina viraḡeniu, wei lamna eḡa kaua ḡaeḡaena tau awariu. Wate kaua ḡaeḡaena lamna BADA Iesu nola i verevereu da ana vikwai. Wei nolana lamna, God ana iviaiai maemaena, riwana ana raugugulei.

²⁵ Maḡamaḡaumi awarimi a nei ma God ana vigulau a raugugulei wate marina a aramanei da amadodo da i nenaē, naou eḡa ona inana-melei. ²⁶⁻²⁷ God ana vilawana ogatarana rava aubaii eḡa ata govaḡi awarimi lamna aubaina riwa bag-ibaginei a ririwemi da mepa da rava au babani eḡa ina vitumaḡanei ma ana lawana maemaenonoana ina vine-boai, lamna eḡa tau au wavu. ²⁸ Taumi babada ma ona paina-melemi, nanare tauvitumaḡana tau aiavoi da Arua vivivireina au urami i teretereia. Ona inana-vaitetei me sipu taupainana ana sipu e paipaini. Tau lamna God ana vinevine taranei i gimarai. ²⁹ A aramanei da ana nae ma au muriu tauraugugula moru-morui ina nei awarimi ma rava ai tumaḡana ina viapoapoeni, me auou moduei sipu au boruna viraḡena aubaina. ³⁰ Ma rava ḡelau ami au dam oina ina vomairi ma ina viararamana ma moruei rava orai ina taini da tau ina votaḡotaḡoi. ³¹ Lamna aubaina matami ina kala ma ona aramanei da madeḡa tonuḡa marai ma waguvarai a notanotaimi ma ana toutou a viviararamanimi.

³² Ma marina God au urana a tereteremi. Ana agu e verevereoimi ona vivitumaḡanei. Wei aguina e vovavirewapanimi, ma ami pulo

ina veremi, aubaina taumi God natunatuna viaiainai. ³³ Ma tau eġa rava ana mane bo ana purapura ata rauoġarei ³⁴ Taumi o aramana-kauei da tau nimauei a nola da mane a vaia da tau au taubagibagi turau aubaiai. ³⁵ Nanare, a viatataiem i da ona nola guratana da mane ona vaia ma molaka ona voagui. Iesu ana babani eġa nuanuami ina vuru, Tauna i riwa i pa, “Verena i ai kaua eġa me vainana.”

³⁶ Paul i babani vorovei ma anapui i mae-ġaira au doa ma i raupari. ³⁷⁻³⁸ I vinolanola i pa, “Amapo eġa naou ona inana-melei.” Wei riwana i vinuabolai da i vitouana, Paul i taragwabei ma i vigia-laġolaġonei. Ma i naiei da au waga i vigeruei.

21

Paul ana vaġai au Jerusalem

¹ Ephesus kerisiana babadai a viegualaei ma wagei jijimanina a nae au Cous bonabonana ma ubaubanai a nae au Roudes bonabonana, kampa da a damana au Patara taon. ² Weka waga ġelauna i nenaie au Phonisia a gerui, ³ da au Saipras bonabonana a rubatawanei, au kelakelauai da a nae au Taia au Syria provins a ġota, da purapura ita viopuni. ⁴ Kampa tauvitumaġana a baiei ma aupom 7 maiteni a mae. Arua Vivivireina kerisiana i riwei da Paul awarina aiwai ina tupua, ma lamna aubaina Paul i viġaei da eġa ina nae au Jerusalem. ⁵ Ma mara i ġetai da ata vomairi, kerisiana awawai maiteni da natunatui taon i voterei ma anapuiwai a ġaira au gera, a raupari gogona. ⁶ A viegualau da tauai au waga a geru ma tau i nae-me ai au numa.

⁷ Au Taia ma a nae au Tolemais taon a ġeta. Tauvitumaġana kampa a nebelei ma aupom tagogi maiteni a mae. ⁸ ✧Ma marana i tom ma dobuna a voterei ma a nae au Caesarea, kampa God riwana taujimeina Philip ana au numa a mae, tauna oroto vi-7-na au Jerusalem i vinevinei da lam taupainina. ⁹ Tauna natunatuna waivinei 4 eġa tavitavinei, tau God ana riwa i vivieġai rava awari.

¹⁰ ✧Aupom vomaġaui i kwa, kerisiana wavana Agabas, tauna nanare God riwana i vivieġai, Judeaei i ġairai au Caesarea. ¹¹ Ma i nei awariai da Paul ana tairoro i vaia ma tauna urana ma aena i raġina-melei ma i riwa i pa, “Arua Vivivireina e ririwa, da Jew babadai wei tairorona taniwagana wenanare ina raġini, ma Jentail au urai ina terei.”

¹² Maranai wei riwana a nonori, tauai kerisiana ġelau maiteni Paul a vibaġana-guratei, da avena ita nae au Jerusalem. ¹³ Wate i pa, “Aiwai aubaina o vivitouana ma orau o viviapoapoeni! Tau a vokaukaua nonoa da ina raġiniu, wate eġa lamna ava ma ina viraġeniu au Jerusalem, BADA Iesu a vovotaġotaġoi aubaina.” ¹⁴ Tauai a viviġaei ma eġa tagotagogina da nuanuana ata sinavirai lamna aubaina riwanana a voterei ma a riwa a pa, “BADA ana ġoanei nanare ina tupua.”

¹⁵ Wei au murina a vokaukaua ma a vomairi au Jerusalem. ¹⁶ Kerisiana ġelau mai Caesarea I naielai Nason ana au numa ma kampa a mae. Tauna oroto Saiprasiei, ma Iesu votaġona i vikareni

maranaina rava vouvounai i vikarei da Iesu Ri-wana Aiaina i rarau-gugulei.

Paul, James i raugenari

¹⁷ Maranai au Jerusalem a ġeta kerisiana ana nuaiaii i nebelelai. ¹⁸ Maratom ġela Paul maiteni a nae da* James a raugenari,† dogadogara anapui kampa. ¹⁹ Paul tau i viegualaei ma ana au vaġai God aiwai i kaukaei Jentail awari anapuna tau i pariveri.

²⁰ Maranaina wei riwai i nonori, tau God i voepaepai ma Paul i riwa i pa, “Turaiai u aramanei mai Jew ai maġa tausan nanare weka Iesu e vivitumaġanei, ma God ana tarawatu e vovotaġo-kauei. ²¹ Wate rava Jew kerisiana weka au Jerusalem am kaua i vibenabenei, da tam Jew Jentail maiteni e mamae e viararamani da Moses ana tarawatu ina gedugeduaiei. Ma u riwei da natunatui ini eġa ina bori ma ai kaua ġelau eġa ina votaġotaġoi. ²² Tau i aramanei da tam u ġetai, Marina aiwai tana kauei? ²³ Aiwai a ririwemi ona kauei. Au nelara 4, tau parivainuaġana bagibagina God awarina i kauei. ²⁴ Ma taravaini ma ona nae au Tempol ma ona viaiaina-melemi ma ma vimaia da tau ai viaiaina pulona ina kauei. Anina ma tau kolai ina ġari ma rava anapui ina aramanei da tam Moses ana tarawatu anina e vovotaġotaġoi, ma babani au naona lamna anapuna moru kaua. ²⁵ ✧Ma Jentail marina

* **21:18:** Wei lamna Iesu ana tevera. Act 12:17; 15:13 ma Mrk 6:3 † **21:18:** Mane anapui ai au vaġai i tami bo rava i puloi i verei damanai mane taupainina i verei ✧ **21:25:** Act 15:29

i vivitumaḡana aubaii pepa a girumi ma wenanare a riwei, sia e pulopuloei kokoitau awarii eḡa ina ani, Tara eḡa ina umai, Rava ḡamoḡamo uai e kikiki tarai eḡa ita toi-tawanana, eḡa ona ani. Eḡa ona viawawana labalababa.”‡

²⁶ Anina ma marana i tom Paul nai nelarai 4 maiteni i viaina-melei God au matana. Muriai Paul i rui Tempol au orana ma i vinolanola piriisi awarii da mara aiwai tau i viaiaina ina voterei. Ma maranaina pulo ita terei tau i tagotagoti ava aubai.

Paul i pani.

²⁷⁻²⁹ ✧ Ma aupom 7 aburuna ava da ita kwa ma Jew ḡelau i Eisia provins maemae tau i Paul i 'nanai Tempol au orana. Au naonei tau i Paul i 'nanai oroto Ephesusei wavana Trophimus maiteni, au taon i bababara ma i notai da tauna Trophimus i ruiei Tempol au orana. Tau i Paul i vojijini ma i garara i pa, “Nelara mai Israel ona nei, ona voaguiai! Wei orotona dobu anapuna e nenaeni ma rava anapuni e viviararamani da mai Jew ma ata tarawatu ma Tempol i parivirevirei. Tauna Jentail i neiai gabuna au vivivireina ma i tuvaidoedoei God au matana!”

‡ **21:25:** Viawawana labalababa wei anapuna e vaivaipai: Rava ḡela awana oroto bo wavine maiteni e viawawana (Exo 20:14, Deu 5:18); Rava ḡela maiteni e viawawana mane bo purapura aubaina (Lev 19:29, 1 Cor 6:15); Natuoim maiteni e viawawana, me oroto natuna wavinena maiteni bo wavine natuna orotona maiteni (Lev 18:6); Orotoma oroto bo wavine ma wavine e viawawana (Lev 18:22, Rom 1:26-27); Rava ma ḡamoḡamo e viawawana (Lev 18:23); Rava ḡela, eḡa awaoim maiteni e viawawana (Eph 5:3); Rava ḡelau e gaegari da maiteni ma viawawana. (Gen 34:7, Deu 22:25-28). ✧ **21:27-29:** Act 20:4

³⁰ Ma rava anata-pui i nonori da au Tempol viġaiġaiawa i tupua ma anata-pui kampa i ruba. Ma Paul i vojijini ma i taina-opunei au doa ma Tempol metaetana i gudui. ³¹ Maranai tau Paul viragēnana i kaukauei, Mai Rome sorodia ai bada ġaeġaena i nonori da viġaiġaiawa ġaeġaena i tupua au Tempol. ³² Tauna laġilaġina ana sorodia ma ai babada i vaini ma i ruba kampa, maranai rava tau i 'nanai, Tau Paul vunuana i voterei.

³³ Sorodia ai bada i nei Paul awarina da i vojijini ma ana sorodia ruaġa i riwei da seinei Paul urana au urai i pani jijini. Anina ma tauna patara i vitara-virevirei i pa, “Wei aiai orotona? Aiwai i kauei?” ³⁴ Patara au orana rava ġelau babani tagogi i gararei, ma rava ġelau babani tapuna i gararei. Rava were da nare i garagarara da sorodia ai bada menanare ita nelaġai ġaiawa karena aiwai, lamna aubaina ana sorodia i egari da Paul ita naiei, ai au bareki. ³⁵ Maranai Paul bareki tetena i tutuġereġerei, patara i ġaiawa guratana aubaina sorodia Paul i voepai da i avarai da ita gagaloei. ³⁶ Patara amapo da tau i vovotaġotaġoi ma i garagarara i pa, “Ona viragēni, ona viragēni!”

Paul patara awarii i babani.

³⁷ Maranai tau aburuna ava da au bareki ita rui, Paul Greekei sorodia ai bada i riwei i pa, “Anina bo eġa da awarim ata babani?”

Ma tauna iauepai ma iriwa i pa, “Tam Greek u aramanei bo? ³⁸ Tau a notai da tam Egyptei, rorova ai babada u viġaviei, Ma rava 4,000 orai potapotai u opunei au mutulua, Tam nai ravana bo?”

³⁹ Paul i paribelana i pa, “Eġa! Tau Jew ei, au taon Tarsus a tupua, au Silisia provins, a vivibaġaim da rava awari ana babani.”

⁴⁰ Tauna i vianina ma Paul au tete i mairi. Tauna urana i voepai da patara garara i voterei. Maranai tau i genuana, Paul tau awarii ai ponanei i babani i pa.

22

¹ “Amamau ma varevareiu, ona rautaniġaneu ma ana viatataiem i da tau eġa aiwai ata kauana-boai.”

² Maranai patarana Paul i nonori da tau i ponei i bababani, tau i genuana ma i rautaniġana.

³ ✧ I riwa:

Tau Jew ei, Tarsus au Silisia provins a tupua wate weka au Jerusalem a rata ma a giruma. Amamata ai tarawatu a girumei ma au tauviararamana Gamaliel.^{*} A ġoana-guratei da God ata voepaepa-kauei me taumi anapumi nanare. ⁴ ✧ Tau Iesu ana etanai tauvotaġotaġoina a rau-iviapopoele i da ġelau i'raġe. Nelara ma waivine a pani ma au numa panipani a tawana-ruiei. ⁵ Pirisi ġeġetelarana ana boru ġeġetelarana† maiteni i aramanei da tau a ririwa kaua. Tau i vianina pepana i vereu da ai rava au Damaskas ata verei ma a nae au Damaskas da kerisiana ata pani ma a neiai da kovoġa ita vaia weka au Jerusalem.

✧ **22:3:** Act 5:34-39 * **22:3:** Gamaliel tauna tauviararamana ma rava aiaina Paul ana au mara. Tauna Pharisi ma boru ġetelarana (Sanhedrin) au orana. ✧ **22:4:** Act 8:3; 26:9-11 † **22:5:** Sanhedrin

⁶ Aubenai Damaskas a tuḡereḡerei ma maratagogi lalaina gamrina ḡaeḡaena marei i ḡairai da i tunui. ⁷ A peu au doa ma pona a nonori i pa, “Saul! Saul! Aiwai aubaina e rarau-iviapoapoeleu?”

⁸ Tau a paribelei, “Bada tam aiai?”

Tauna i paribelei, “Iesu Nasaretei e rarau-iviapoapoelei.”

⁹ Rava maiteni a nenaē lalalaina i ’nanai wate babani eḡa ita nonori.

¹⁰ A paridadana a pa, “Bada Aiwai ana kauēi?” Ma Tauna i riwa i pa, “Ma vomairi ma nae au Damaskas. Kampa rava am nola ina pariverem.”

¹¹ Lalalaina gamrina irata guratana ma matau i kamoi da eḡa ata inainana. Ma tauvigwanigwaniana au urai i voa ma i naieu au Damaskas.

¹² Orotō wavana Ananias kampa i mae tauna God i voepaepai ma ana tarawatu i vovojijina-noe. Mai Jew tauna i vivirana-kauēi. ¹³ I nei da au ririvau i mairi ma i riwa, “Vareiu Saul ma inana me!” Nai marana a inana me.

¹⁴ Anina ma i riwa, “Amamata ai God i rautanim, da ana ḡoana ma aramanei, ana Taunola Jijimanina‡ - matamei ma inana, ma riwana taniḡamei ma nonori. ¹⁵ Aiwai u inainana ma u nononori ma vimatematei rava anatapui awarii. ¹⁶ Marina aiwai e paipaini! Tauai ana babataitoim ma BADA awarina ma raupari da am ḡo’apoapoei ina oḡa-tawanei.”

‡ **22:14:** Rava Jijimanina bo bulobulona, lamna Iesu wavana. Paul eḡa Iesu wavana ita latoni mepa da taurautaniḡana mai Jew ita viamloḡaiḡaini.

¹⁷ Anina ma a nae au Jerusalem. Au Tempol a raraupari ma matauei kaua a inanai. ¹⁸ A inanai BADA awariu i bababani i pa, “Rava weka am jima tau aubaiu eġa nonorana ita ġoeġoei. Laġilaġina Jerusalem ma opu-tawanei.”

¹⁹ Wate tau a paribelei, “BADA wei ravai i aramanei da pari numai a nepai da kerisiana a vunui ma a pani-naiei. ²⁰ ✧Ma maranai am peroveta Stephen tarana i toi, tau kampa a maimairi ma ana iraġe a vianinei ma ġaima tautawanai ai gara a paipaini.”

²¹ Ma BADA i riweu, “Ma nae a paripari-tawanem aueia Jentail awarii.”

Paul e ririwa da tauna Romei

²² Patarana Paul i rarautaniġane i ma maranai wei babanina i kauai tui i meji guratana ma i vigaragararei i pa, “Ona viraġena-tawanei, eġa ina mae!”

²³ Tui i vigaragararei, ai kwama i kwajikwajiei ma pokau i tawatawanei awarina. ²⁴ Ma sorodia ai bada sorodia i egari da Paul i naiei ai au bareki. Ma i riwei da Paul ita wipi da ita vieġa aiwai aubaina ana rava amloi i ġaiġai ma awarina i garagarara. ²⁵ Ma urana ruaġa i terepai au aidamo ma i raġiraġini da ita wipi ma Paul sorodia ai bada i riwei i pa, “Tau Rome-ei, Eġa ota etareu ma o vunuvunu-labalababaiu. Lamna menanare?”

²⁶ Maranai sorodia ai bada wei i nonori ma i nae da ai bada ġaeġaena i parivere i. Ma tauna i vitara-virevire i pa, “Aiwai e kaukauei? Wei ravana Rome-ei!”

✧ **22:20:** Act 7:58

27 Sorodia ai bada i nae Paul awarina ma i paridadanei, “Ma riweu! Riwa k^{au} da tam Rome-ei bo?”

Ma Paul i paribelei, “Ee, lamna riwa k^{au}!”

28 Sorodia ai bada Paul i riwei, “Tau mane g^{ae}gaena Rome gabemanina a verei da a vimai Rome.”

Paul tauna i riwei, “Tau a tupua da Rome-ei.”

29 Sorodia i g^{oe}i da Paul ita etarei wate maratag^{og}i ita g^{or}i-melei. Ai bada ita g^{or}i ma i rovo-kauk^{au} maranai i aramanei da i kauana-boai da Paul, Rome-ei seinei i pani.

Paul Jew ai boru g^{et}elarana § au naoi i mairi.

30 Au maratamna sorodia ai bada i g^{oe}i da ita aramana-k^{au}ei mai Jew ai viwavu aiwai Paul awarina. Ma lamna aubaina Paul ana seinei i votawatawanei ma i opunei boru g^{et}elarana au naona i vimairini.

23

1 Paul boru g^{et}elarana i 'nana-jijini ma i riwa, “Varevareiu tau au nola God awarina i jijimana ma orau aiaina da wei paratana.” 2 Ma Pirisi g^{et}elarana Ananias rava g^{el}auna Paul au ririvana i maimairi i egari da Paul i raunavanavai. 3 Ma Paul Ananias i riwei, “God ina raunavanavaim, tam mo-rumorum! Moses ana tarawatuei e rarauetareu wate maranai am rava u riwei da i raunavanavaiu tam tarawatu u viaigai.”

4 Tau i Paul au g^{er}e g^{er}ena i maimairi Paul i riwei, “Aiwai aubaina God ana Pirisi G^{et}elarana e vivijibo gⁱ?”

§ 22:29: Wei lamna Sanhedrin

⁵ Paul i paribelei, “Varevareiu eġa ata aramanei da tauna God ana Pirisi ġeġetelarana. Au buka i terei da *Eġa God ana taunola ma parivai-apoapoeni.*” (*Exodus 22:27*)

⁶ ☆ Anina ma Paul i ’nanai da Sadusi ma Pharisi ġelau kampa ma ponana i rata ma i riwa, “Varevareiu tau Pharisi, amau maiteni Pharisi. A vivitumaġana da God rava iragelei ina vovaimairini wei lamna aubaina taumi o etaetareu!” ⁷ Maranai wei ilatoni Pharisi ma Sadusi vipariparinigai i raukarei ma boru i kai da ruaġa. ⁸ ☆ Aubaina Sadusi e ririwa da rava e irairage lamna eġa ita vovomairi me, ma anela da aruarua eġa ita vivitumaġanei, wate Pharisi wei anatapui e vivitumaġanei.

⁹ Gaiawa ġaeġaena i tupua ma tarawatu babadai ġelau tau Pharisi, i vomairi ma i babani guratana i pa, “Tauai eġa aiwai apoapoeni ata inana wei ravana awarina! Mepa da anela bo Bada Aruana tauna awarina i babani?” ¹⁰ Viġaiġaiawa ġaeġaena i tupua ma sorodia ai bada i rovo mepa da rava Paul ina viasikasikai ma sorodia i egari da i rui ma Paul i taravaina-opunei ma ina naieiau bareki.

¹¹ Ma waguvarai ġelauna, BADA Paul au ririvana i mairi ma i riwei, “Tepam ina tora! Me aubaiu u jima au Jerusalem nanare aubaiu au Rome ma jima.”

Mai Jew i vioga da Paul ina viragēni

¹² Ubaubanai mai Jew ġelau i vitagogiei ma i viogatara ma i parivainuaġana da eġa ina am bo ina uma da Paul ina viragēni. ¹³ Nelara 40

nanare i vianina da Paul ina viragēni. ¹⁴ Tau i nae pirisi babadai ma dogadogara awarii ma i riwei, “Tauai parivainuaḡana bagibagina a kauēi da eḡa ana am da Paul ana viragēni.” ¹⁵ Taumi Boru ḡeḡetelarana maiteni ona moru ma riwa ona paritawanei sorodia badana awarina da Paul ina neiai ma ona vitara-virevirei da riwa kaua ona vaia. Tauai ana vīpaipai da ana viragēni muriai da weka ina ḡetai.

¹⁶ Wate maranai Paul avuna wei ogatarana i nonori ma i nae sorodia ai au bareki ma Paul i parivereī.

¹⁷ Ma Paul sorodia badana i ḡoreiai ma i riwei, “Wei laragana laḡilaḡina ma naiei ami badawarina da ana riwa ina riwei.” ¹⁸ Ma i naiei ai bada ḡaeḡaena awarina ma i riwei, “Panipani wavana Paul riwa i paritawanei awariu ma i riweu da wei laragana ata neiai awarim aubaina am riwa awarina.”

¹⁹ Sorodia ai bada ḡaeḡaena laraga i vinimavoai ma i maeria ma i paridadanei, “Am riwa aiwai ma riweu?”

²⁰ I riwa, “Mai Jew i riwa da ita vibaḡaim da au maratom Paul uta naiei ai au Boru ḡeḡetelarana, Wei anatapuna moru. ²¹ Wate eḡa ma rautaniḡanei aubaina rava 40 nanare pota e paipaini da ina viragēni. Tau i vioga da eḡa ina am da Paul ina viragēni. Tau i vokaukaua ma am vianina ava e paipaini.”

²² Ma bada laraga i riwei da eḡa ai ai ina riwei ma i paritawanei.

Tau i Paul i paritawanei Gavēna Felix awarina.

²³ Anina ma sorodia ai bada gae^gaena babada rua^ga i goreiai ma i riwei, i pa, “Sorodia sod ravai 200, aiera ravai 200 ma hos ravai 70 ma vaia ma ona vokaukaua da waguvarai 9 oklok ona vomairi. ²⁴ Hos bia^ga ona vaia Paul aubaina da aiaina ona naiei gavena Felix awarina au Caesarea.”

²⁵ Ma sorodia ai bada pepa wenanare i girumi:

²⁶ Tau Claudius Lisias, a girugiruma awarim au bada vinualaulaunam, Gavena Felix.
Egualau.

²⁷ Mai Jew wei orotona i vojijini ma ita vira^geni, wate maranai a nonori da tauna Rome-ei ma lamna aubaina au sorodia maiteni a opu da au urai a vaitawanei. ²⁸ A goei da ata aramanei ana apoapoe aiwai, da ata naiei ai Boru ge^getelerana awarina. ²⁹ Ma a nela^gai da viwavuna lamna tauiva ai tuma^gana kauai ma Rome ana tarawatuei lamna tauna e^ga aiwai apoapoenaita kauei da ata vira^geni bo ata pani. ³⁰ Maranai riwana a vaia da mai Jew i goei da govagova^ganei tauna ita vunui. Lamna maratagogi a paritawanei awarim, ma nanare tauviwavu a riwana-guratei da kampa ina getai da ai viwavu ina kauei.

³¹ Ma sorodia ai babada i ririweia nanare i kauei ma waguvarai Paul i taravaini ma i naiei da au taon Antipatris i geta. ³² Au maratamna aiera ma sod sorodiai i naeme au Jerusalem ma hosi sorodia Paul i naei au Caesarea. ³³ Maranai hosi sorodiai au Caesarea i geta pepana ma Paul gavena i veredamanei au urana. ³⁴ Gavena pepa i 'avi ma Paul i paridadanei metauna provins-na u tupua ma i riwa, “Silisia.” ³⁵ Gavena i riwa i pa, “Am

etara ana nonori maranai am tauviwavu ina ġetai.”
Ma sorodia i naiei Herod numa i voavoaiana da
ita inana-vaitetei.

24

Paul Gavena Felix au naona i mairi

¹ Apom 5 au murina Pirisi ġeġetalarana Ananias
ma dogadogara i ġaira au Caesarea ai tauraue-
tara wavana Tertelus maiteni. ² Ma Paul i ġoreiai
gabemani au naona. Ma Tertelus i vomairi ma
viwavuna i vikarei:

Au bada Felix *vinualaulaunam, Am
vibadanei ta mae ubauba ma ata nota eġa aiwai.
Ma kua vouii ma aiaii u kaukauei ata dobu
voana aubaina i voagu-kaueta. ³ Anatapuiai
mepamepa a mamae a vinuaiaii kua tam awarim.
⁴ Wate eġa ata ġoei da ana visina-viraviraim. Ma
lamna aubaina a ġoeġoei da uta rautaniġaneu
mara aburuna ava.

⁵ Tauai a nelaġai da wei ravana lamna orana
potapotana ma viġaiġaiawa tauvikareina mai
Jew awarii dobu au anatapuna. Tauna boru
vouna e ġoreġorei mai Nasaret† ai bada. ⁶ Tai

* **24:2:** Felix ana au vibadana lamna eġa ita ai. Tertelus
lamna Felix i gwalagwalamerui da Paul ita viwavi ma ita pani. Felix
rava vita ġaeġaei i verei da madeġa ruaġa i kwa Sisaei Nero wei
ravana i viopuni. Ġavia ġaeġaena i tupua ma Jew Rome i viġaviei
ma tau Jerusalem i rikai da eġa aiwaina ita mae. † **24:5:**
Wava Nazarene lamna Iesu ana tauvotaġotaġoi e babaniei aubaina
tauna Nasaretei. Maranai Tertelus tau i ġorei Nazarene Lamna
Kerisiana e vivijiboġi. Jew Jerusalem ei ma Judea Provins anata-
puna mai Galili provins ravai e inainana ġairei, (John 1:46 ma iavi).
Tauna wate e ririwa da menanare Paul e tapataparoro nei lamna mai
Rome ai tarawatu e viviaigai.

i ġoei da Tempol maiteni ita tuvaídoedoei ma lamna aubaina a pani. ^{7 ‡} ⁸ Ma rautarei ma ma nelaġai da ai viwavu lamna anapui riwa kaua.

⁹ Ma mai Jew Tertelus au murina i mairi ma i riwa, “Wei babani anapui riwa kaua!”

¹⁰ Anina ma Gavena Felix Paul i raumotemotei da ita babani. Paul babani i vikarei i pa:

Au bada vinualaulaunam, a aramanei da tam madeġa biāġa wei dobuna ai taurautara lamna aubaina tau ana nuabau ana babani aubaiu.

¹¹ Am rava ina riwem da tau pom ota aupom

¹² nanare a ġeta memei au Jerusalem da BADA

ata voepaepai. ¹² Au tauviwavu eġa ita nelaġaiu

ata viġaiġaiawa au Tempol bo au boru-numana

bo mepa nanare au Jerusalem. ¹³ Ma ai viwavu

tau awariu menanare tana aramanei da lamna

riwa kaua? ¹⁴ Wate riwa kaua da tau amamata

ai God a voepaepai ma BADA Iesu ana etanai,

a votaġotaġoi ma tau i ririwa da wei lamna

taparoro morumoruna. Wate nanare Moses

tarawatu i girugirumi ma God ana peroveta

nununai i girugirumia anapuna a vitumaġanei.

¹⁵ Tau God awarina a vitumaġana guratana me

ravai nanare, da tauna muriai rava anapui

iraġelei ina vilawana-melei, ravai aiiai ma rava

apoapoei. ¹⁶ Lamna aubaina a kaukauana guratei

da orau ina ai rava ma BADA awarii.

¹⁷ ✨ Jerusalem a netawanei madeġa biāġa i kwa

ma pom ota a nememei da molamolakai ata puloi

‡ **24:7:** Verse 7 lamna buka waduwaduboi biāġava au orana e mamae, wate buka Greek ponanei i girugirumi maġamaġai wei ves-na au orana eġa. ✨ **24:17:** Act 21:17-28

ma pulo ata kauēi God awarina. § 18 Tau aiaiu, maranaina i nelaġaiu au Tempol viaina pulona a kaukauei. Eġa patara maiteni ma eġa visinaviravira. 19 Wate mai Jew ġelau Eisia provinsei i nei kampa. Tau i mēpa marina! Ita nei au naom da ai viwavu ita terei. 20 Bo babada weka ita riweta au apoapoe aiwai maranai boru ġeġetelarana au naona a mairi. 21 ☆Wate mēpa da maratagogi awarii a garara a pa, “A vitumaġana da God rava anatapui iraġelei ina vovaimairini! Lamna aubaina tau weka a maimairi.”

22 Felix tauna BADA Iesu ana Etanai riwana i aramana-kauēi, boru i gudui ma i riwa, “Maranai sorodia ai bada Claudius Lisias ina nei, ma ina paribelem.” 23 Ma sorodia ai bada i egari da Paul ita inana-vaitetei ma ita voterei da ita bababara ma ana rava ita nei da ita raraugenari.

Paul Felix i viararamani

24 Aupom biaġa au murina Felix awana Drusila maiteni i nei. Drusila lamna wavine Jew ei. Ma riwa i paritawanei da Paul i neiai, ma rava ai tumaġana Iesu Keriso awarina i babaniei ma Felix i rautaniġana. *

§ 24:17: Madeġa 5 i kwa ma Paul i nememei au Jerusalem da ita mae mara aburuna da tauvitumaġana ita vovaivirewapani ma ana babara ma nolana aiaina ita virarautuei. (Act 18:22) ☆ 24:21: Act 23:6

* 24:24: Mēpa da Drusila Jew wavinena awarinei Felix wei ravai e ġoreġorei tauvitumaġana i aramane. Drusila lamna Herod Agrippa natuna guguinina umauna ana madeġa 20. Tauna wavalatona Siriei i ravaġi wate i voterei maranai ana madeġa 16 da Felix i ravaġi. Wei lamna ana tavine viruiaina ma Felix ana tavine vitonuina.

²⁵ Wate maranai Paul babani i vikarei da God ana ġoana, da rava lawana aiaina ma jijimanina ina maeni, ma erawa kauai ma ġo'apoapoe ina geduaiei, aubaina mara e nenei maranai rava anatapui ina etarei. Felix wei babanina i nonori tauna i rovo ma Paul i riwei, "Ma nae! Ma maranai ana ġoem lamna ana kwatuem." ²⁶ Ma Felix i ġoeġoei da Paul tauna manelei ita ġwalai ma lamna aubaina mara i maġa i raukwatuei ma awarina i babani.

²⁷ Madeġa ruaġa au murina Felix i rautom ma ana gabu Posias Festus i vaia. Felix i ġoei da wavana ita ai mai Jew awarii lamna aubaina Paul au numa panipani i votere-tawanei.

25

Paul i vibaġa da Sisa au naona ita mairi

¹ Festus i ġeta au Caesarea da ana nola ita vikarei ma aupom vitonuina i ġae au Jerusalem. ² Weka pirisi ġeġetelarana ma dogadogara Festus i nebelei ma ai viwavu Paul awarina tauna i verei. ³ Ma Festus i vibaġai da ita voagui da Paul ita paritawanei au Jerusalem. Taui ava i vioga da Paul au etanai ita viraġeni. ⁴ Wate Festus i paribelei i pa, "Paul au deri au Caesarea ma tau a ġaiġaira me kampa aupom ruaġa au murina. ⁵ Mepa da Paul aiwai i kauana-boai lamna ami Babada maiteni ana ġaira da kampa ami viwavu ina terei."

⁶ Aupom 8 da 10 nanare au murina Festus i ġaira me au Caesarea ma maratamna au numaetara i kiala ma ana sorodia i eġara da Paul ita ruieiai au naona. ⁷ Maranai Paul i ruieiai, ma Jew babadai

Jerusalem ei i gairai i nei awari ma ina viwavui, kaua ma^gama^gai apoapoei aubaii. Wate tau i ai viwavu anata^{pui} anona e^ga.

⁸ Paul wei *viwavui i vinua-nainei ma i pa, “Tau e^ga aiwai apoapoena ata kauei mai Jew ai tarawatu awarina bo ai Tempol awarina bo Caesar awarina.”

⁹ Wate Festus i goei da mai Jew ita vinuaiaini lamna aubaina Paul i paridadanei i pa, “E goegoei bo e^ga da tana gae au Jerusalem ma etara?”

¹⁰ Paul i riwa, “Tau marina Caesar ana au etara gabuna a maimairi, weka ina etareu. Tam u aramana-kauei da tau e^ga aiwai apoapoena ata kauei mai Jew awarii. ¹¹ Wate mepa da aiwai apoapoena a kauei lamna ma vira^geniu. Tau e^ga ira^ge ata rovoei. Wate mepa da wei lamna viwavu moru lamna e^ga aiai ana rewapana ita mamae da ina veredamaneu. Tau a viviba^ga Caesar awarina!”

¹² Festus Caesar ana dogadogara ai nota i vaia ma i paribelana i pa, “Tam u viba^ga Caesar awarina, Anina Caesar awarina ma nae.”

Festus Paul ana babani gulau Agrippa i pariverei

¹³ Aupom bia^ga au murina gulau Agrippa† novuna Benisi maiteni i nei au Caesarea da gavena vouna Festus i raugenari da ita viegualaei. ¹⁴ Ma i mae aupom voma^gauna ma Festus Paul i rarauetara gulau i pariverei i pa, “Felix panipani tagogi weka

* **25:8:** Paul au Tarsus i tupua wate tauna wavana Rome gabe-manina awarina. Lamna aubaina tauna ana rewapana e mamae da ana nuabola ina naiei au Rome da Caesar ina rautarei. † **25:13:** Wei lamna Herod Agrippa 11, Herod Agrippa 1 natuna.

i voterei. ¹⁵ Ma maranai a nae au Jerusalem mai Jew ai pirisi babadai ma dogadogara ai viwavu i neiāi awariu ma i vibaḡaiu da Paul ata viraḡeni.

¹⁶ —Ma a riwei da tauai mai Rome ai tarawatu e ririwa da eḡa rava ana kovoga labalababai da au naona ana rauetarei. Tau i na ḡetai da ai viwavu taurauetara au naona ina mairi da ina gagaloana-melei. ¹⁷ Maranai tauviwavu maiteni weka a ḡetai. Tau eḡa ata vipaipai ma maratomna a egara da ravana i neiāi da ita etara.

¹⁸ Tauviwavu i vomairi ma a notai da aiwai apoapoena aubaina ita viwavui wate eḡa. ¹⁹ Anina kaua biaḡa ava ai taparoro kauaii, ma rava tagogi irairaḡena wavana Iesu i vitarapiriei. Wate Paul e ririwa da Iesu lawalawaina. ²⁰ Tau nuanuau i raḡaraḡa menanare riwa kaua ana vainei ma Paul a paridadanei da i vianina da maiteni ata ḡae au Jerusalem da kampa ata etarei. ²¹ Wate Paul i vibaḡa da Caesar ana viwavu ina rautaniḡanei. Ma sorodia a egari da au numa panipani ina paini da ana paritawanei Caesar awarina.”

²² Ma Agrippa Festus i riwei, “A ḡoei da ravana ana babani ana rautaniḡanei.”

Ma Festus i paribelei, “Anina, au maratom ma rautaniḡanei.”

Gulau Agrippa Paul i rautaniḡanei

²³ Au maratomna gulau Agrippa ma Benisi gulau garai i oteni ma ana gabemani babadai ḡaeḡae maiteni, i arana-ruiei au boru numana. Festus ana sorodia i egari da Paul i ruieiai. ²⁴ Festus i riwa, “Gulau Agrippa ma anatapumi o rieiai weka, wei ravana o inainanai! Tauna mai Jew au

Jerusalem ma weka au Caesarea e gōeōgoei da ina iraḡe. ²⁵ Wate tau a nelaḡai da tauna eḡa aiwai ita kauana-boai da ina iraḡe. Wate i vibaḡa da Caesar tauna ina rauetarei. Lamna aubaina a pariparitawanei Caesar awarina. ²⁶ Wate Caesar aiwai ana riwei, eḡa ata aramanei aiwai ana girumi? Lamna aubaina a neiai awarimi ma tam gulau Agrippa maiteni da tana babaniei da nota ona vereu da aiwai ana girumi. ²⁷ Aubaina eḡa ita ai da panipani ana paritawanei Caesar awarina ma ana viwavuna eḡa!”

26

Paul ana gudu i tarai

¹ Ma Agrippa Paul i riwei, “A vianinem da ma babani.” Ma Paul urana i voepai ma ana gudu tarana i vikarei ² i pa:

I ai kua gulau Agrippa da amadodo tam au etara e rarautaniḡanei da Jew babadai ai viwavu awariu ana tere-vaiijijimani. ³ Tau aramanei da tam mai Jew ai giu ma ai paripariḡai u aramanana-kauei. Lamna aubaina a vivibaḡaim da au paribelana ma rautaniḡanana-kauei.

⁴ Mai Jew anatapui au lawana i aramanei, aburu da marina, au dobu oina da au Jerusalem.

⁵ ✧Tau i rorova ava i aramaneu ma ina riwem da tau ai boru bagibagina ma piripirina, Pharisi au orana a rui ma tarawatu anatapuna a vojijina-kauei. ⁶ Ma marina a vivitumaḡana da God aiwai noinoita i parivainuaḡani ina kauei. Ma lamna

✧ 26:5: Act 23:6

aubaina tau weka a maimairi. ⁷ Wei parivai-nuaḡanana ata dam 12 e vipaipaiei da ina nei lamna aubaina ata rava i vipatutu ma marai ma waguvarai God e viviborumei. Au gulau wei vitumaḡanana aubaina mai Jew e viviwavuii. ⁸ Aiwai aubaina o notanotai da God eḡa tagotagogina da rava iraḡelei ina vovaimairini?

⁹ ✧Tau au naona a notai da aiwai anatapuna ata kauai da Iesu Nasaretei ata viḡaviei. ¹⁰ Ma anina lamna a kauai au Jerusalem. Pirisi ḡeḡetelerana babadai pepa i verei ma lamna i vovai-virewapaniu ma kerisiana vivivireii maḡamaḡai au numa panipani a terei, ma nanare ai iraḡe a vianinei. ¹¹ Mara maḡamaḡai boru numai a naeni da kerisiana a vununaiei da ai tumaḡana ita boviei. Amlou i ḡaiḡai kaua da dobu ḡelau i naeni kerisiana a baibaiei.

¹² Mara tagogi pirisi babadai au Jerusalem pepa i vereu da rewapana i vereu ma a nae au Damaskas. ¹³ Ma aubenai nanare, tau au etanai a nenaie ma a inanai, lalalaina marei i ḡairai ma i lalalaina, gamrina madeḡa i ḡetawanei! Au rava maiteni a bababara i lalalaina. ¹⁴ Anatapuiai a vipeuana au doa ma pona Hebrewi awariu i bababani. I riwa, "Saul, Saul aiwai aubaina e viviḡavieu? Tam e ḡoēḡoei da Tau ma viapoapoeniu wate eḡa da tam e viviapoapoenimelem!"

¹⁵ Ma a paridadana, "Bada tam aiai?"

Ma BADA i paribelei, "Tau Iesu, ravana tauna e viviḡaviei. ¹⁶ Wate ma vomairi. Tau a nei awarim da vaivai ata verem da ma vitaunola

✧ 26:9: Act 8:3; 22:4-5

Tau aubaiu, ma amadodo aiwai u inanai ma aiwai ana viatataiem, ma vimatamatei rava awarii. ¹⁷ Tau ana gagaloem am rava mai Israel awarii ma nanare Jentail ravai awari, ma ana paritawanem Jentail awarii, ¹⁸ da matai ma vikalai, da ai lawana apoapoe ina voterei ma ina nei au lalalaina, ma Satan ana rewapana ina votere-tawanei ma ina nei God awarina. Tauna ai go'apoapoe ina nota-tawanei, ma ina taravaini natunatuna rarautanii, ai tumaḡana awariu aubaina.”

¹⁹ Lamna aubaina Gulau Agrippa, tau riwa marei au inana a inanai a voteletelei. ²⁰ ✧ Au naona a jima mai Jew awarii au Damaskas ma nanare au Jerusalem ma Judea anatapuna ma muriai Jentail maiteni awarii. A jima da ai go'apoapoe ina votere-tawanei ma ina mae-tavirei God awarina, ma ai lawana ina vimataira da ai kaua apoapoe i voterei-tawanei.

²¹ Wei babanii aubaina mai Jew au Tempol i vojijiniu ma i ḡoei da ita viragēniu. ²² Wate God i vilawaniu da marina, ma weka a maimairi da a vimatamata rava muomuoi ma nanare rava ḡaeḡaei awarii. Aiwai a bababaniei lamna peroveta nununai ma Moses i ririweta ina tupua. ²³ ✧ Tai i riwa da tauvilawana Keriso ina vinuapoapoe. Ma tauna ina irage ma ina vinoa da ina vomairi me ma wei matairana ina vinolanola da tauna God lalalaina mai Jew ma Jentail aubaii.

²⁴ Weka Festus i vionaḡi ma i garara Paul awarina,

“Tam u bua! Am aramana i vibuaim!”

²⁵ Wate Paul i paribelei, “Au bada Festus tau eġa ata bua. Tau aiwai a bababaniei lamna riwa kaua ma babani anona. ²⁶ Wei kaua eġa gov-agoavaġana ma aramanei da Gulau Agrippa anata-puna i aramanei, ma lamna aubaina ana tepatorau wei kauai ana babaniei awarina.” ²⁷ Paul Gulau Agrippa i riwei i pa, “Peroveta e vivitumaġanei bo eġa? A aramanei da nanare!”

²⁸ Ma Agrippa i paribelei, “U notai da tau laġilaġina ma sinaviraiu da ana vikerisiana!”

²⁹ Paul i paribelei, “Laġilaġina bo amapo, a raraupari God awarina da tam ma rava anatapui wei au boruna ina tupua-vira me tau nanare wate eġa sein maiteni.”

³⁰ Anina ma gulau ma gavena ma Benisi i vomairi ma i nae. ³¹ Ma anatapui i nena ma i babani vivira ma i vianina i pa, “Wei ravana eġa aiwai apoapoenaita kauai da tana viraġeni bo tana pani.”

³² Ma Agrippa Festus i riwei, “Mepa da eġa ita vibaġa ġae Caesar awarina, lamna marina tata rupeni.”

27

Paul wagei i vaġai nae au Rome

¹ Festus mara i tereterei i ġetai da tauai ata nae au Rome. Paul ma tau ma panipani ġelau maiteni au waga a geru ma a vaġai Rome aubaina. Rome ai sorodia badana wavana Julius au urana i terelai. Tauna Caesar ana sorodia vinevinena. ² Waga Adaramitei i nei da a geru ma wagana i ġota-nae au Eisia provins gerana. Orotu wavana Aristakas ana

dobu Thesalonika au Masedonia provins tauna maiteni i geru.

³ Au maratonna au Sidon taon a gōta, Julius ivina i ai Paul awarina ma i voterei da i opu au gera da ana rava ita raugenari ma ana gōana aiwai ita vibaḡei. ⁴ Muriai wagei a opu da a nēae ma ive i verau-matamataniai ma lamna aubaina bonabona au Saipras ma dobu ḡaeḡaena au pouna au mu-laḡina ambori. ⁵ Ma boga ḡaeḡaena a bori da Silisia provins da Pamphilia provins geraii a voterei da au Maira taon a rui au Lisia provins ⁶ Au Maira taon kampa sorodia badana mai Egypt ai waga Alexandriei i nēae au Italy kampa i vigerui. ⁷ Ma aupom maḡamaḡai nuatauai a ruba ma a voia guratana da Cinidus taon a tuḡereḡerei wate ive i verau-matamataniai da kampa waga a virai da Crete bonabonana ma mutu Samone au poui au mu-laḡina a nae. ⁸ Ma kampa nuatauai bonabona Crete gerana a naeni aubaina mara i apoapoe ma a ḡeta dobu e ḡoreḡorei U Aiaina, Lasea taon au ḡereḡerena.

⁹ Mara ḡaeḡaena a vine-boai au vaḡai* ma Rupena Ujina marana boiboḡi i kwa,† marina lamna ive ma rabama ai mara ma boga babarana i vinirovorovo. ¹⁰ Ma Paul i riwa, “Nelara, malana a vaivaia da ata vaḡai ina apoapoe kaua ma waga ma pura-pura tana vine-boa-pai. Ata lawana maiteni tana vineboai.” ¹¹ Wate sorodia ai bada, kapena ana babani i rautaniḡanei ma eḡa Paul da kampa ata mae

* **27:9:** Iri i parei da kojikojira ana mara ma i vaḡai. † **27:9:** Eng. Atonement bo *Yom Kippur* marana wei lamna September bo October rabama ma ive ai mara

ma eġa ata nae. ¹² Wei gabuna eġa ita ai wei ivena au marana ma rava maġamaġau i goei da waganei ata nae da Phinix una, Crete au bonabonana da kampa ata mae da bodu ita kwa. Wei u ġaeġaena ma mutuii lavarata ma rauanaġa e vinao-vereverei, da au mulaġina e mamae.

Kojikojira Ġaeġaena

¹³ Maranai rauanaġa i vikarei ma waga ravai i notai da marina mara aiaina da ita nae au Phinix una. Ma anika i taini ma Crete bonabona geraei i nae. ¹⁴ Ma eġa barana ita uama ma kojikojira‡ olei iveiai. ¹⁵ Ive wagana i verau-matamatani ma waga eġa tagotagogina da ita vobelei ma i voterei da ive waga i avara-opunei. ¹⁶ Bonabona aburuna Kauda gerana au mulaġina a ruba ma kampa a voia ġuratana da dingy a terepai au waga da a ragita-jijini. ¹⁷ Wei i kauana vorovei ma ġuravei waga au gabaurina da waga adana i raġita-kwaviviroi. Tau i rovo mepa da au maratete ina amġaena au Syrtis,§ Libya au gerana. Lamna aubaina ġuravei ai da kuka, i raġita-tagogiei ma au boga i viorereni da waga ita bibi. Ma i voterei da kojikojira waga i avaranaiei. ¹⁸ Maratomna kojikojirana i rarau-guratanelei da purapura ġelau i au boga a viorereni. ¹⁹ Aupom vitonuina tau waga purapurai i viorereni au boga. ²⁰ Kojikojira i ruba da aupom biāġa da madeġa ma ubona i purui. Ravai ai nota i kwa.

²¹ Wei au marana rava au waga am i kauana-avei, anina ma Paul i vomairi ma tau i riwei, “Nelara ota rautaniġaneu ma Crete eġa tata oputawanei,

‡ **27:14:** Kariwabu ġaeġaena § **27:17:** Wei lamna maratete.

amapo waga eġa tata viapoapoeni ma ata purapura eġa tata vineboai. ²² Wate a ririwana-guratemi da eġa orami ina peu! Aubaina avena da waga ina monu wate eġa ina iraġe. ²³ God lamna tau au BADA ma ana taunola tau. Waguvarai God ana anela i paritawaneiai awariu. ²⁴ Ma i riwa, ‘Eġa ma rovo! Tam anina da Caesar au naona ma etara! Ma ġelauna lamna God ana nuavaina maemaena rava anatapui maiteni e vaġavaġai ina lawana.’ ²⁵ Lamna aubaina tepami ina tora! Aubaina tau God a vivitumaġanei ma menanare i ririweia nanarena ina tupua. ²⁶ Wate tauta au maratete tana amġaena.”

²⁷ Kojikojira i avara-naielai au Mediterranean Boga da aupom 14 ikwa ma nubautuva waga ravai malana i vaia da tau i gera i tuġereġerei. ²⁸ Ma barawa au giana ġaima i raġini ma au boga i tawanana-ġairei da topa ana gabinou ita aramanei. Ma i aramanei da 40 meter ma i mae aburuna ma i raudadana-melei lamna marina 30 meter. ²⁹ Ma tau i rovo mepa da rabama waga au kira ina viarikarikai lamna aubaina waga au ipuna anika 4 i tawana ġairei ma i vipaipai da mara ina tom tawanana. ³⁰ Ma waga ravai ai kaua i kaukauei da ita ruba-govaġa. Ma i vioga da dingiei ita opu waga au naona da anika ita dubara-naiei, ma lamna aubaina dingy i teretere-ġairei au boga, ³¹ Wate Paul sorodia ai bada maiteni i riwei, “Mepa da waga ravai ina rubatawanemi lamna anatapumi ona iraġe.” ³² Ma sorodia dingy ġuravana i borituini ma dingy kwakwavina i peu au boga ma i avara-naiei.

³³ Ma maratomtomi Paul rava anatapui i egari

da ita am, i pa, “Taumi marina aupom 14 rovo i kauemi ma eġa ota am.” ³⁴ “Tau a vivibaġa-guratemi da ona am da ona virewapana, eġa aiai tagogi ina iraġe.” ³⁵ Paul i babani vorovei ma au matai palawa i vaia, BADA i viegualaei ma i vogimai ma i ani. ³⁶ Ma rava anatapui inana ma orai i bagibagi ma am i vikarei. ³⁷ Tauai anatapui 276 au waga. ³⁸ Ma rava anatapui i am da i am-iaua. Ma witi baikei au boga i viorereni da waga ita votelatelai da au gera ita ġota da avena ita amġaina.

Waga au maratete i amġaena

³⁹ Maranai mara i tom tawanana tau i dobu i nanai wate gerana eġa ita aramanei, wate U inana da gerana aiaina ma i notai da gerana aiaina da waga kampa ita viġaeni. ⁴⁰ Anina ma anika ġuravai i viaituini, ma labilabi i tere-ġairei, ma waga au naona kuka voaburuni i votawatawanei ma gera aubaina i ruba. ⁴¹ Wate waga au maratete i amġaena da i tapaiei, ma rabama waga ipuna i viairikarikai.

⁴² Sorodia i ġoei da panipani ita viragēni, da avena ita toa-ġaira au gera ma ita viruberubei. ⁴³ Wate sorodia ai bada i ġoei da Paul ita vilawani ma i viġaei, anina ma ai viogataru eġa ita kauei. Ma tau i aiavoi toa i aramanei i egari da i viauepa au boga ma i toa-ġaira au gera. ⁴⁴ Ma ġelau i aiwai da i tenatenam i vidauei. Ma nanare anatapui lawalawaii au gera i ġota.

¹ Maranai a ḡota au gera ma a aramanei da tauai au Malta bonabonana. ² Dobuna ravai i nebelelai ma ivii i ai kaua awariai. Garewa atuna i vikarei ma i ubauba, ma tauai au gera ai i viviri. ³ Ma Paul ai ragorago i ḡuna da ai au tepana i tereterei ma mota ḡaiḡaiawana ai bolana malana i vaia da i opui ma Paul nimana i ani. ⁴ Dobuna ravai i 'nanai da motana Paul au nimana i dawedawe ma i pari-ararava, "Wei ravana lamna tauviraḡena ma eḡa ita monu wate ata god* e ririwa da tauna eḡa ina lawana." ⁵ Wate Paul motana i viaikwajiei da ai au menamenana i rauei ma tauna eḡa ita kero. ⁶ Rava i vipaipai da Paul nimana ita dodo bo ita peu da ita iraḡe. Wate maranai i vipaipai guratana ma i 'nanai da tauna anina, tauai ai nota i virai ma i riwa da tauna god ḡelauna.

⁷ Au gerana a ḡotaḡota - lana au ḡereḡerena lamna dobuna badana Publius ana wapu ḡaeḡaena. Tauna i taravainiai ma i paina-kauelai da aupom tonuḡa ⁸ Publius amana i doria manawa ruba ma iniḡuḡura i vaia da i matamatave, Paul i rui inanana aubaina ma urana au tepana i terei ma i raupariei ma i vilawani. ⁹ Anina ma rava anatapui doridoriai au bonabona i nei ma i vilawani.

Paul au bonabona Malta da i nae au Rome

¹⁰⁻¹¹ Kampa mai Malta maiteni a mae nawaravi tonuḡa. Ma ravai i voagu-kauelai ma maranai ata vomairi, ai ḡoana vaḡai aubaina anatapuna i verelai. Ma waga ḡelauna a gerui lamna mai Alexandria ai waga bodu aubaina kampa i mae.

* **28:4:** God wavinena wavana kaua aiaina bo kaua jijimanina (Justice).

Waga au naona lamna ai god ruaḡa kokoitau i tai†. ¹² Kampa ma a amkuka-nae da au Sairakius a ḡota ma a mae aupom tonuḡa ¹³ Kampa da ambori damana au Regium ma maratonna rauanaḡa i wanabauni ma amkuka ma geraei a ruba da maratom ḡela au Puteoli a ḡota. ¹⁴ Kerisiana kampa a nelaḡai ma i riwelai da maiteni a mae wiki tagogi. Anina ma a babara-nae da au Rome taon a ḡeta. ¹⁵ Kerisiana au Rome riwai i vaia da a nenei ma i ḡei da ita nebelelai, ḡelau i ḡei au taon e ḡoreḡorei Vaḡavaḡai Tonuḡa ai Numa ma ḡelau i ḡae Apus ana au maket. Maranai Paul wei ravai i 'nanai, ma i vinuai i kua ma God i viegualaei. ¹⁶ Maranai au Rome taon a ḡeta tau i Paul numa i verei da ainelana i mae ma sorodia i terei da i 'nana-vaitetei.

Paul au Rome i raugugula

¹⁷ Ma aupom tonuḡa au murina Jew babadai kampa maema ei i rauḡoreiai ma awarii i babani, “Varevareiu tau eḡa aiwai ata kauana-boai ata rava awarii bo amamata ai tarawatu ata viaigai. Wate au Jerusalem i paniu ma i veredamaneu Rome gavena awarina. ¹⁸ Mai Rome i etareiu ma i ḡoei da ita rupeniu aubaina eḡa aiwai apoapoena ata kau ei da ina virageniu. ¹⁹ ✧ Wate Jew babadai wei eḡa ita ḡoei ma lamna aubaina Rome babadai a riwei da tau eḡa ana mae wate ana ḡae au ḡaeḡaena Caesar awarina da ita rauetareiu. Wate lamna

† **28:10-11:** Wei lamna mai Rome ai god raḡaraḡa wavai *Castor ma Pollux* ruaḡai e ḡoreḡore *Dioscuri* bo raḡaraḡa marei, Tau i lamna god *Zeus* ma *Leda* natunatu. ✧ **28:19:** Act 25:11

eġa au rava ata viviġaviei, eġa. ²⁰ Lamna aubaina a ġoremi weka da tata babani gogona, ma ata riwemi da tau a vipanipani aubaina a vitumaġana da mai Israel ai tauvilawana wariaġa i ririwei boiboġi i nei.”

²¹ Tau i paribelei, “Tauai eġa pepa Judeaei ata vaia bo ai rava riwa ita neiai. ²² Tauai aramanei da ravai anatapui kerisiana boruna e paripari-virevirei. Wate tauai a ġoei da am nota ana vaia.”

²³ Ma tau i mara i terei da Paul maiteni ita viboru, ma patara i ġetai mepa Paul i mamaelana. Ma ubaubanai Paul God ana vigulau jimana i vikarei da waguvarai i vorovei. Moses ana tarawatu ma peroveta nununai ai au buka i mairi ma i jima. I ġoei da orai ita taini da Iesu ita vitumaġanei.

²⁴ Ana babaniei ġelau i orai i taini ma ġelau eġa ita vitumaġana. ²⁵ Ma tau i ava babanina i viparipariniġaiei ma muriai da ita vilamonei Paul wei riwana tagogi i latoni i pa, “Arua Vivivireina riwa kua Peroveta Isaiah ponanei amamami i riwei i pa:

²⁶ *Ma nae am rava mai Israel awari da ma riwei,
ona nononora wate eġa ona araramanei
ona inanai wate eġa anona ona aramanei.*

²⁷ *Aubaina wei ravai orai i bado.*

Taniġai i gudui,

Tau i matai i vopotai.

Mepa da tau i mataiei ita inainana,

taniġaiei ita nononora

oraiei ita araramanei,

ma ita mae-tavirei awariu ma ata vilawani. (Isaiah 6:9-10)

28-29 —Lamna aubaina ona aramanei da God Ri-wana Aiaina vai-melana aubaina i paritawanei Jentail awarii. Tau i ina rautaniḡana.”

³⁰ Paul kampa numa i vivimaiei ma i mae madeḡa ruaḡa taputapuna. Ma rava maḡamaḡau i nenei da i raraugenari ma wei i vinuaiaiei. ³¹ Ana tepatorana God ana vigulau ma Iesu Keriso riwana Aiaina i jimei. Ma eḡa aiai ita viḡaei.

Wedau Mark
The Gospel of Mark in the Wedau Language of Papua
New Guinea
Buk Mak long tokples Wedau long Niugini

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

PDF generated using Haiola and XeLaTeX on 22 Feb 2024 from source files dated 31 Aug 2023

aa19f3e3-98fb-51fa-9c53-3906edc75f11